

MFUMÙ MUBÈNGIIBWE



... bwa butumbi bwa Mukalenge kutwadiibwabu pambidi pèètù leelu ewu ku diyishiibwa dya Dìyì. Nenku cidi . . .

² Lumingu lushààle elu, mvwa anu nsaama ndambu. Ki nkwamba anu menemene ne mvwa nsaama to; civwa nditeeta divwà dikèngelà bwa mèmè kupitaku, mateeta a mubidi. Nenku ki cinùvwà bumvwe ncyôci aci, bwa ne mvwa nsanganyiibwa mu lupitaadi. Civwa mbwalu mvwa mumùye bwa kabikengedi bwa mèmè kwikala ngàtwa dyamunu ngàtwa dyàmwàmwa dya musulu to. Bàdi bàkuteeta njila wa byàkudyà wa kuulu ne njila wa byàkudyà wa kwinshi. Nenku bìdi bikèngela bwa kucyenzabò bôbò, ku ndambu yònsò wa tusunsa, bìdi bikèngela bwa kwalukilabo ne kupicilabo cyakabidi ku cyamu cya mîdimà. Kadi tudi ne cya kucyangata, piikalàbi ne tudi twenza ngendu ya dikayiisha ya dyàmwàmwa dya mbù, ku ngondo yisambombo yònsò. Mwaneetu Roberts ne bakwabo, ngeela meeji, bàdi bàngata byabo ku ngondo yisambombo yònsò. Kadi mèmè ncìvwakù mwangate nansha cimwe to munda mwa bidimu binaayi.

³ Lutatu lùdi ne, mèmè ncitu anu munange manga a misanda a mafuta awu to, ki cintu cimwepele ncyôci aci. Ne bôbò bàdi bàmba ne kakwena cîngà cintu cìdibo mwa kufila pamutu pàà aci to, pa nanku mèmè, kaa, mvwa ngumvwa ku mwoyi kungenda bibi be pàvwàbo bampeesha bintàkanyì abi. Nudi bamanye ne, nkààdi munulondele, mu bwalu-bulonda bwa nsòmbelu wanyì, mùdi bintàkanyì abi bìngendesha ku mwoyi. Nenku—nenku mèmè ntu anu mukine dinwa dya bintàkanyì abi. Ki mèmè kwambila mulunda wanyì ngangabuka wa maalu mîmpè awu, ní. . . “Kakwenaku cînga cintu anyì?”

Ki yèyè ne: “Ncyèna ngeela meeji ne cìdikù to, Mwaneetu Branham.”

⁴ Kaa, pààkabwelà inàbànzà awu naabi, byenzè bu ne, pàmwàpa mèmè ngudi wela nsèkà’s, kadi, bìvwà byenzè anu bu litre mujimà. Civwa—civwa . . . kacya mèmè ncitu mwanjì kubimonaku bùngì naka to. Nenku mèmè kudikwata anu ku dyùlu ne kudipangisha mwa kwakula. Kadi ndekeelu wa byònsò mèmè kufika anu ku dibimina’s.

⁵ Kadi mpindyewu, mu diteeta dyònsò adi, ne kujikadi dyònsò, ndi muswe kwela Mukalenge twasakidila bwa diteeta dîmpè dipwàngàne. Ndi mukwate diteeta adi, lukama pa lukama; ndi mwa kuya mwaba kanà wònsò pa buloba wùndi muswe kuya awu. Mèmè kukonka bangangabuka abu, bàvwà basatu bàà batàmbe bwîmpè bapiluke, bwa, ngeela—ngeela meeji, mu

Louisville mujimà. Ki mêmè kubakonka, ngamba ne: “Ndiku ne dipangila nansha dya bya pa lukama dikumi anyi?”

6 Bôbò ne: “Kwêna ne dipangila nansha dikese to.” Bôbò ne—bôbò ne: “Udi ne mubidi tumatuma, mu byônsò.” Nénku ndi ne kusakidila kwàbûngi kùdì Nzambi. Nkùdì nganyì mukwabo kùdici cifwànyine kufùmina piikalàku kakùyì kùdì Taatù wetù wa mu Dyulu, nwamonu’s, bwa kwikalabi mushindu awu?

7 Ki kwambaye ne: “Dyèbè...Dyèbè dizòla dijimà didi dìleeja, mwômò amu ne, wêwè ucìdì mwána mutekete.” Yèyè ne: “Tubulu twèbè twa mashi kí ntwanjì nansha kubanga kutaayika to, anyì ní ncinyi.” Yèyè ne: “Wêwè udi tumatuma, Mwaneetu Branham.”

Ki mêmè kwamba ne: “Ee, ndi ne disanka’s.”

8 Ki mêmè kupeta dyèsè dya kuyiikilanganaku, dya kufilaku bujaadiki kùdì munganga yônsò wa mu lupitaadi alu, ne ngangabuka yônsò, bwa Bukalenga bwa Nzambi. Ne ngangabuka kampanda, ngeela meeji ne yèyè ùdi ne cya kwikala mwaba ewu mu dinda emu. Nénku ndi—nèngiikalè mwa... Ndi ne disanka dya kumanya ne kùcìtukù anu bantu bîmpè pa buloba apa, bantu bàà cya bushuwa, bantu bàdì bafwànyine kungangata bwa matuku ataanu, kumpicisha ku diteeta dya mubidi, didì difwànyine pàmwàpa kuyiila ndola nkama yibidi anyì nkama yisatu bwa dyônsò dya kùdiwu. Pàngààkajikijà, kwambabo ne: “Ki dyetu peetu dikwacisha ku mudimu wa Mukalenge, wùdì wêwè wenza.” Nwamonu anyi? Eyowa. Kacyi nansha...Bôbò ne: “Mona’s, wêwè’s udi utuumvwija bundu, bwa ditwela mene dya lukonko lwà ní udi ne cya kutufuta alu.” Bôbò ne: “Anu masambila ebe cyanààna bwetu twètù!”

9 “Kadi munda,” mwàkambàbo, “tudi tusangana cintu kampanda cya disaluka citùdì katùyì mwa kuumvwa to.” Ki mêmè kwamba...“Tudi...Kacyena—kacyena cimweka bu ne cidi...” Yèyè ne: “Lwà pambelu, kwêna ubinduluka anyì utacishiibwa to. Kadi,” yèyè ne, “lwà munda, mùdì disaluka kampanda ditùdì katùyikù mwa kuumvwa to.”

10 Mêmè kwamba ne: “Bu nwênù mwa kusòmbelakù anu panshi kaaba aka bwa katanci kakese cyanààna, nènnwàmbilè.” Ki mêmè kuditwa mu dyakula bwa bikeena-kumona. Bwabo bôbo cívwa mbuluba bukwabo. Kabàvwakù bamanye kantu nansha kamwe pa bwalu abu to. Mêmè kubambila bwa Bible. Pashiishe kubambila bwa cikeena-kumona cívwa Mukalenge mufume ku dimpeesha dituku adi, kadi kudilabo mwadi bu bânà bàà mu maboko. Basòmbè anu mwaba awu bàdila mwadi. Ki mêmè...bôbò...mêmè kwamba ne: “Ndi ntekemena ne kanwena nungangata bu muntu kampanda wa cimfikààmùndà wa mu maalu a ntendeleelu anyì wa bishi to.”

11 Yèyè ne: “Nansha kakese, Mwaneetu Branham. Mêmè ndi ngiitabuuja aci ne mwoyi wànyì wônsò.” Yèyè ne: “Kadi kùdì

cintu anu cimwepele cyanàànà cîndi muswe kwamba: Kùtu uya mu kalaasa bwa kulonga abi bintu to.” Yêyè ne: “Ndi ngiitabuuja ne bìdi bifumina kùdi Nzambi wa Bukole bwônso.” Ne biine abu bàvwa bangangabuka basatu bàà ku batàmbe kumànyika mu Louisville, bàà batàmbe bwimpè bàvwàbo naabo. Ne, pa nanku, mvwa ne disanka dyàbûngì bwa bwalu abu, ne bwa kumanya ne pàmwàpa Mukalenge ùvwa mumfikìshe ku dikuna dya ndambu wa Mamiinu kuntwaku.

¹² Munganga yônso, ngâkaakula nende. Bôbò, mu dinda kampana, mu dipatuka dya mu cibambalu cya cyamu cya midimà, mêmè kwambila. . . Mêmè kutangila mukaji kampana mukwate ne bya luse. Ùvwa lùyòwayòwa lwà dikema. Ki mêmè kutungunuka anu ne kupweka, mêmè kupweka too ne mûngâakalwà kufika pàvwàye apu. Mvwa ndyambidila ne ùvwa mufwànyine kwikala ùpunga ne lufu. Ki mêmè kwamba ne: “Ndi muswe nkweleku lukonko, mwaneetu wa bakaji.”

Yêyè kwamba ne: “Eyowa’s, mukalenge.”

Mêmè ne: “Udi mwena Kilisto anyi?”

Ki yêyè ne: “Ntu wa mu ekeleeziya *kampana*.”

¹³ Ki mêmè ne: “Ndi muswe anu ntookesheku aci ndambu.” Mêmè ne: “Ndi—ndi muswe kumanya ní udi mwena Kilisto, mwena Kilisto wa cya bushuwa. Bwa ne, ní udikù mwa kusabuka kuya dyàmwàmwa dya mbû wa mwoyi wa panu ewu, bwa kubwela mu Buloba bukwabo abu, udikù muMunange anyi?” Mêmè ne: “Newikalekù bulelela musùngidiibwe anyi?”

Ki kwambaye ne: “Eyowa’s, mukalenge. Nêngiikalè musùngidiibwe.”

¹⁴ Ki mêmè kwamba ne: “Nenku Nzambi abeneshe mwoyi wèbè. Nànshi maalù mayè mu nùnkù anyi mu nùnkù, wèwè udi anu bimpè dîbà adi, pàdîbi nanku.”

¹⁵ Nenku patùdi anu twendakana eku ne eku, kùcìdi kushààle anu bantu balenga bààbûngì pa buloba.

¹⁶ Mpindyewu, leelu, ndi mulwe ne cikeena-kumona cîngiikalà mwa kunulondela pashiishe ndambu. Kadi ndi muswe kwanji kwakulaku, dyambedi, pa Dîyi ndambu, bwalu mêmè ndi ngiitabuuja ne Dîyi ndidi ne mushinga wàbûngì, ditàmbe kwikala dya mushinga wàbûngì mpindyewu. Ne ndi ne disanka dya kumona Charlie Cox, ne, mwaneetu wa balume, mulunda wanyì udi mwimane pààpa wàwa, bônso pamwe. Mwaneetu, ncyênàku mwa kuvuluka. . . Jeffries, ncyèna mwa kuvuluka dîna dyèndè to. Bààbûngì bàà kunùdi nwènù bânà beetu bàà mushinga mukole bàà ku Géorgie, bafùmìne ku bitùpà bishilèshilàngàne bya ditunga. Mulunda wanyì wa kale, Bill, udi musòmbe apa ewu, ngeela meeji nyèyè, mu dinda emu. Ne—ne bààbûngì. . . Nenku mwaneetu wa ku Géorgie wàwa, bantu bàvwà bampèeshe nkoooci ewu abu. Nudi bamanye’s, ki—ki umwe

wa ku nkoozi ya mitàmbe bwîmpè ya kacya ngaavwalaku. Ndi ndyumvwa anu bilenga, bilenga bya dikema menemene. Ne nudi ne mushinga wàbûngi be kûndi. Pângàànwàmobilà bìdi byenzèke, matuku makese àshàadi aa, kûndi, nenumone ne mbwà cinyi ndi ngeela meeji ne cidi ne mushinga wàbûngi kûndi.

¹⁷ Mpindyewu, ngeela meeji ne, bu Mukalenge mwa kwanyisha, ndi muswe kulwà mvita bikolè kutàmbe bya kwònsò eku, mu nsòmbelu wanyì. Bwalu, ndi musangane mpindyewu ne bìdi. . . Mu bushuwa bwa bwalu, ndi mufwànyine kufwa leelu ewu. Aci, katwèna bamanyè to. Bipeta bya diteeta dya mùdi mwoyi wànyì wùtàmbulà ne bikwabo byònsò, mishindu mishihilàngane dikumi ne yisambombo ya nsèsà ya cyamu cya mídima, eyowa, mateeta à mubidi mujimà, mbileejè ne mvwa mu. . . bikùmbànàngane menemene anu mùdi muntu kanà yònsò ewu mufwànyine kwikala, muntu wetù wa pa buloba ewu. Pa nanku ndi ne kusakidila bwa bwalu abu. Kadi, bintu byònsò, nansha biine byònsò abi, nansha mùndi ne kusakidila ne kwanyisha kùdi Nzambi, kwa ne mèmè, ndi ngiitabuuja ne Yèyè ùcidi anu ùndama mu mudimu Wèndè, kacivwa civwàYe mundeje kumpala ndambu kwa cyôci aci to, nwamonu's, ncimpeeshe anu disanka dyàbûngi.

¹⁸ Mpindyewu, ngeela meeji ne, diloolo edi. . . Mbikumbane nanku bwèbè wèwè anyi? [Mwaneetu Neville ùdi wàmbe ne: "Eyowa's, mukalenge."—Muf.] Mwaneetu wa—wa balume wa mushinga mukole udi—udi muntu wa kàyi citù ki—ki Mwaneetu Neville. Ne bu ne muntu kampana wa kunùdi ùvwakù kaaba aka mu dyalumingu dishààle ne muteeleje diyiisha dilenga divwàye muyiishe adi, pa "kàsù kàà mànyi," òvwa. . . dimwe dya ku mayiisha a matàmbe kutùmbuka ànkaadiku mèmè ewu muteeleje, ndivwà Mwaneetu Neville muyiishe adi, ku Nyuma Mwîmpè, mu dyalumingu dishààle, ditwàdila kasumbu kakese kàà mikooko kàdi Nzambi mukungwije aka.

¹⁹ Nanku bu byòbi bifwànyine kù kwikala bìmpè, bisànkisha Mukalenge, ne Mwaneetu Neville ne ekeleeziya ewu, ndi muswe kwakula cyakabidi diloolo edi ne kubanga mulongolongo wa mayiisha wa, twàmbe ne, mu dimwe diloolo. . . ndi muswe kwamba ne, mu dyalumingu diloolo, ne mu diisàtù diloolo, ne mu dyalumingu dilwalwà, mulongolongo wà bìndi mulonge.

²⁰ Kabivwa bifwànyine kukengela bwa mèmè kwikala mushàale mu lupitaadi mwàmwa to. Kadi bàvwa badileeje balenga bàà dikema kûndi, mu mishindu wà bampèeshe too ne cibambalu cya mfuta mfranga bu cyabisatu cimwe cya mushinga. Ki pa nanku mèmè kwangata Bibles yànyì, mikanda yànyì, ne kubunya kalààlù, ne kushààla mudibunyine anu menemene mwaba awu, ne kwangata Bibles yànyì yònsò ne bikwabo bitèeka binnyùngùlùkile. Nanku mèmè kupicila anu cya bushuwa mu cikondo cya dicyònkómoka, too ne pààkalwàbo ne bwanga bwa misàndà bwa mafuta abu muntwamu. Cikondo

cyànyì cya dicyònkómoka aci cyùmba ciimanyina anu mwaba awu mene. Bwànyì—bwànyì pààbù bùmba bùtùuka anu dibà adi. Kadi, Mwaneetu Pat, ku mwoyi kwakangenda anu byetu bya menemene ebi. Bintàkanyì abi, ncyèna mwa kubitwalaku to. Ne, kadi mvwa munkaci mwa kupìcila mu cikondo cya dicyònkómoka, munda mwa matuku asatu anyì anaayi a kumpàla awu. Mvwa mpìcila mu cikondo cya dicyònkómoka.

²¹ Nenu mvwa munkaci mwa kulonga Mukanda wà Efeso. Kaa, diteeka dya Ekeleeziya kaaba kamwe adi's we! Ne ndi ngeela meeji ne ncintu cilenga cya dikema.

²² Nenu—nenu pawikalà, mpindyewu, pawikalà ne ekeleeziya kùtù uya, ndààku ukiimane pa kaaba kèèbè kàà mudimu. Kadi pawikalà kùyi ne ekeleeziya to, ne wèwè muswe bwa kwalukila diloolo edi, ne mu diisàtù diloolo, ne mu dyalumingu diloolo, ndi muswe kwangata, diloolo edi, Mukanda wà kumpala wà Efeso; ne mu diisàtù diloolo, nshapita mwi² wa Efeso; ne mu dyalumingu dilwalwà, nshapita mwi³ wa Efeso; bwa kuteeka Ekeleeziya mu bulongame. Nudi bamanyè cìndì njinga kwamba aci, nditèèkiibwa Dyèndè, bilondèshile kaaba. Nenu ndi ngeela meeji ne ndiibakiibwa, bwa Ekeleeziya.

²³ Mèmè ncyèna . . . Ndi—ndi ngambila eci anu bàtù bàlwa mu Branham Tabernacle.

²⁴ Nenu piikalàbi ne yònsò wa kunùdì nwènù bânà beetu bananga. . . Ndi mumanye ne bamwe bàà kunùdì, ngeela meeji, bàdì ne masangisha. Mwakunyeetu wa balume udi mu Sellersburg awu, ne—ne bakwabo bashiilèshiiàngàne, bàdì ne masangisha. Mpindyewu, tângilàayi, awu mmasangisha a matabuluja. Nùkabwelàayi mu òwò awu. Mbasadidi bàà Kilisto, nsongàalùmè yìdì miimane pankaci, bàdì bapàtùke. Ekeleeziya wabo sungasunga pàakabèngàye mene Bulelela, ne bintu bya mushindu awu, bôbò kutapuluka nende dyakamwe. Ki Nzambi kubabiikila ku mudimu wà bwambi. Eyowa's, mukalenge. Ndi—ndi ngaanyisha muntu. . . Ncyèna nansha mwa kuvuluka dînà dya mwine muntu awu to. Kadi yèyè nnsongàalùmè wa citende, wa maalù malenga, muntu wa kwìsù kulenga, mwikàle ne mukaji mulenga ne bânà.

²⁵ Nenu—nenu Mwaneetu Junie Jackson ùdì wènza masangisha lwà kwinshi eku, yèyè kabidi ncikwabo civùlukilu cilenga cya dikema cya pabwàci, cya ngàsà udi ukèmesha wa Nzambi. Nenu pàdìbo bènza matàbuluja mu ekeleeziya yenu, ndàayi anu kùdìbo aku, bwalu ki cyenu. . . ki cintu cya dyenza ncyòci aci. Bwalu, kanwena bamanye to, nkufwànyine kulwa ngènzàmpèkààtù ku cyoshelu, ne wèwè mufwànyinekù kwikala mwenzejiibwe bwa kulombola muntu awu kùdì Kilisto, ciikalà dyèbè difutu dinene dya luseke lwà dyàmwàmwà.

26 Eci cidi anu dilongesha cyanààna ne ditèèkà dya Ekeleeziya mu bulongame, ku tabernacle eku, biikàle twambulwishangana patùdì twenda tuya apu.

27 Mpindyewu, ncyèna mulwe ne dībà dyànyì dya ku diboko to, pa nanku nebikengele bwa muntu kampana kwikalaye ùntàngidilakù dībà. Doc wàm̄bi wàndèèjì ne, yèyè ùdi ne dībà, pa nanku, mwaneetu. Pa nanku mpindyewu. . . [Mwaneetu Edgar “Doc” Branham ùdi wàm̄ba ne: “Ncyakukufucishiladi mfranga yàbùngì to,” nenku ùdi ùpèèsha Mwaneetu Branham dībà dyèndè dya ku diboko—Muf.] Kwakumfucishiladi mfranga mipitepìtè bùngì to? Eyo. Ee, mpindyewu, abi’s mbìmpè. Ee, mpindyewu, ncyèna ngeela meeji ne cintàkanyì ciine cidi mu cyòcì to, twamb’eku twamb’eku. Pa nanku. . . [“Twasàkidila. Ndi nkwela pàànyì patòòke.”] Mpindyewu, kaa, kaa, sh, sh, sh, sh. [“Mvwa mulaminyine tuumeeyà dikumi, dya mufikilu wà dilediibwa dyànyì, mu dinda emu, anu bwa ne nkufikisheku anu ku didyumvwa bilenga.”] Wambilamù anyì? Mpinyewu aci cidi. . . Ntankù ewu mmubànde bikole menemene bya bitàmpe bwimpe’s dībà adi, Doc. Wàm̄bi ne mmulaminyine tuumèyà dikumi, dya mufikilu wà dilediibwa dyèndè, bwa kumfikishayè ku didyumvwa bilenga, bwalu kùdi bantu babidi anyì basatu pankaci pèndè yèyè ne mèmè. Pa nanku nudi mwa kumona ne mèmè nkàadi penyi, mu njila amu’s. Kadi, kaa, aci kaciyena citacishaku to nansha kakese, bwànyì mèmè. Mpindyewu, ncyakwakula ntanta mule menemene to.

28 Mpindyewu, pìikalàku beenyi munkaci mwetu, cya bushuwa ne tudi baswe kunwakidila bilenga ne mwoyi wètù wònsò. Mushindu awu ngunùdì baakidiibwe bilenga mwaba ewu ku kaatabernacle kakese aka. Katwena ne citanda ciine cya nsongo to. Kùkaadi ndongamu mpindyewu bwa kutwibakilabo, kaciyi nzubu munene to, kadi anu. . . Ewu yèyè ùkaadi musunsuke anu menemene. Nenku netùteetè bwa kudiibakilakù ekeleeziya mukese mulenga ne mucyankàme mwaba ewu, patùdì anu ne. . . pìikalà anu Mukalenge mutwànyishile bwa kucyènza. Ne bàabùngì bàà kunùdì nwènù bònsò bàdi munkaci mwa kudyenzeja bwa cyòcì eci, ne cya bushuwa ne tudi twanyisha cyòcì aci.

29 Mpindyewu ndi muswe bwa nwènù kubuululaku pamwe naanyì, mu dinda emu, mu kubala, mu Samwèlè wa Kumpala nshapita wa 8, bwa kubangila lwà ku, tùbangilàayi lwà ku mvensa wa 19, mvensa wa 19 ne wa 20, pàmwàpa, bwa kaacyena-bwalu kakese bwa dyumwija kampana.

30 Nenku mpindyewu, panùdì nucyangata apu, ne kumpala kwa twètù. . . Netucibale, ne pashiishe tudi baswe kupita ku disambila. Nenku nkufwànyinekù kwikala malomba mu dinda emu, bwa kwamba ne: “Mvùlùkèku anu cyanààna” anyì? Mu didisangisha dyetu dya ndekeelu, kùkaadi mbingu yibidi, anyì yisatu, pàmvwà mwenze disangisha. . . Twàm̄bè ne, twètù. . .

³¹ Byôbi biine, panùcidi nwenda nubuulula apu, disangisha didi dibanga mu Chautauqua, mu matuku a ngondo a6 mpindyewu. Tudi bindile cikondo cya dicyonkomoka, mu Middletown, mu Ohio. Nwênù bàdì ne diikisha dyenu kumpala eku abu, nwâlwayi. Nenku cituudilu cinène, anu lwà ku musulu aku, kùdì, kaa, twètù. . . diyiisha dyônsò dinùkaadiku bumvwe adi. Bàdì mu myaba yônsò ku musulu aku, bayiishi, dinda ne dinda dyônsò, mundaamuunya mujimà ne mu diloolo mujimà. Nenku bàdì bàdisangisha bônsò pamwe. Ncituudilu cinène, cinène citàmbe Silver Hills kule ne kule, misangu bûngiyì. Ne—ne pashiishe mwaba mwalabale kuntwaku wutùdì mwa kusòmbesha bantu binunu mwandamukulu anyi binunu dikumi. Ne pàtu misangu yônsò anu pùle patapata. Tudi ne cikondo cya dicyonkomoka mu Ohio.

³² Nenku Mwaneetu Kidd mukole, ùmvwà muye kasambidila awu, dinda kampana. Nudi bônsò bavuluke, pângàakanwàmbilà kùkaadi mbingu yisatu apu anyi? Ngangabuka wàkamupèèsha mèbà makumi abidi ne anaayi, bwa ne ngàvwàye mwa kwikala ne mwoyi. Ùkaadi mwimànyine kuulu wènda wèndakana. Wàkatèèla Mufundu kampana, musambu wùvwàye kàyi mwa kwimba to. Kadi pângàakabwelàmu ne kumutangila, dinda kampana, ne écharpe mukese awu mwela pambidi. Mvwa muumuke kaaba aka mèbà bu asatu anyi anaayi kumpala kwa bufuku kucyabu, bwa ngaamona mwa kufika kùdiye. Bàvwa bambe ne yèyè ùvwa mwa kutuula nkinda diine dituku adi; kansere mu mpàci wa mènýi.

³³ Ki mukàjèndè mukese, mukulakaji, wa mushinga mukole awu, ùvwa ùsukwilangana bilàmbà bàmfuta meeyà makumi ataanu ku dituku; mmùmwè ne nkumpala kwa bufuku kucyàbu, too ne paanyima pàà bufuku, bwa meeyà makumi ataanu, bwa kulama bàyèndè mu budimi bwa bwambi bu muyiishi. Ùvwa ùyiisha ditabuluja dya mbingu yibidi, ùsangisha mulambu, ùpeta meeyà makumi mwandamukulu.

³⁴ Kadi mvwa mubamone basòmbè mwaba wàwa dinda kampana, babàkà bakese bakulumpe, banaayi, babàkà bakese babidi's we, basòmbè mwaba wàwa, ne écharpe wèndè mukese awu mwela pa dikaaya. Ki umwe wa ku bààkakùdimwishàye mucima, wa bidimu makumi citeema ne bibidi, mwikàle anu ùbàlakana bu dîbà, wa bwalu mwena Mpenta wa mu umwe, musòmbè mwaba awu, nudi bamanye's. Ki mèmè kwamba ne: "Nudi bamanye nwênù banunu aba cinùdì basòmbèle kaaba aka? Bindile anu bwa bwàtù kulwabu." Ki cyônsò cidiku. Mudimu wabo, cikaadìbo bakùmbàje, kii—kiipacila kàkaadìbo bakùmbàje aku, nenku bàkaadi badìlongòlòle mpindyewu bwa kuyabo ku difutu dyàbò.

³⁵ Ki mèmè kwambila Mwaneetu Chev, cyôci aci ncyàmbila Mwaneetu Kidson. . . Kidd, mu dinda adi ne: "Newikalè ku disangisha dya ku Chautauqua."

³⁶ Mmumbiikile ku telefone makeelela awu, wàmba ne: “Ndi . . . Nèngiikalèku, Mwaneetu Branham.” Bilenga be.

³⁷ Bààbùngì mu masangisha, mbapatukile ku mudimu wànyì mupyamupya wà bwambi. Mwaneetu kampanda wa balume, mwaneetu wa mu ba-Baptistes udi mwimane kaaba aka wàwa, mwanèndè wa bakaji, nsongààkàjì, ùvwa bu wà mutu mukole ndambu. Ki mèmè kumwambila ne: “Ndi nkupeesha mwaneebe wa bakaji bwa bwalu bwa Mukalenge Yesu,” dinda kampanda. Nenku pààkaalukilàye kwèndè kumbelu, mwanèndè awu’s mmusungidiibwe. Ne mukwabo nyèyè ewu kaaba aka mu dinda emu, bwa kubatiijiibwaye ne kutungunukaye ne kuya.

³⁸ Ki muntu kampanda, Mukalenge Sothmann, mulunda wanyì wa ku Canada, màmwènèndè mu mushindu wà ùpunga ne lufu, mèmè kwamba ne: “Udi usangana màmwènèèbe awu pawàfikà kuntwaku, bilenga, mutangile ku dyumvwa dya bìmpè, mwikàle bìmpè.” Ki mushindu awu menemene wùvwàbi. Nenku anu . . . bantu biikàle anu babwela. Cìdi anu ku mbangilu waci mpindyewu, munkaci mwa kukwata mudimu. Kadi, kaa, tudi tutekemena bya bìyiila ne panshi, bùngì kabùyi kwamba kumutu kwa byònsò abi. Tudi mu matuku mabi ne a ndekeelu, kadi mu díbà dya butumbi.

³⁹ Mpindyewu, udi ne Bible webe, bwa kubala, nshapita wa 8 wa Samwèlè anyì? Nenku mvwa mulaye Gene ne àshaalè kuntwaku, bwa kukwàta pa mikàbà bikwabo bya cyòci eci. Tucìvwa anu tubangilakù, mu disangisha dyetu adi.

Nansha nanku bantu bààkabènga kutumikila dîyi dya Samwèlè, ne bààkamba ne: To, kadi netwikalè ne mfumu kumutu kwetu;

Bwa twètù . . . mwa kwikala bu . . . ditunga, matunga ònsò; ne bwa wetù mfumu kwikalaye ùtùlumbulwisha, ne ùpàtuka ùya kumpala kwetu, ne ùtùlwangeena mvita.

. . . Samwèlè kuumvwaye mèyi ònsò a cisàmba aa, ne . . . kuàmbululayè mu maci a MUKALENGÈ.

Ki MUKALENGÈ kwambilaye Samwèlè ne: Teeleja dîyi dyabo bòbò, nenku ubapetele mfumu. Ki Samwèlè kwambilaye bantu bàà Izaleela ne: Ndàayi muntu ne muntu ku cimenga cyèndè.

⁴⁰ Mpindyewu bu ne bìvwa bikèngela bwa mèmè kuteeta bwa kusungwila ku cyòci eci, mu dinda emu, cìndi mufwànyine kwinyika ne ncyena-bwalu aci, bwa ndambu wa tusunsa tùdì tùlondà etu, ndi muswe kusungula cyena-bwalu cya ne: *Mfùmù Mubèngiibwe.*

⁴¹ Cìvwa ncikondo cya ne, anu mùtùbi mu bikondo byònsò amu, bantu kabàyikù baswe bwa Nzambi àbàlombòle to. Bòbò mbaswe bulombodi bwa mushindu wabo bòbò. Nenku bwalu-

bulonda ebu mu dinda emu. . . Nenuku panwikalà baalùkile mu mèènu, mbifwànyineku kwikala bimpè bu nwènu mwa kubùbala too ne ku ndekeelu. Mùvwa mmu cikondo cya—cya matuku a Samwèlè, muntu wa Nzambi, muprofeta. Ne yèyè ùvwa muntu mululame, ne muntu mwimpè, wa kuneemekibwa, mumanya ne ngwa kweyemenyibwa, wa lulamatu ne meeji matooke kùdi cisàmbà, kàyikù ùbàseeswisha to, ne kàyikù ùbàmbila cintu nansha cimwe to anu EMU MMÙDI MUKALENGE WÀMBA wa buludi.

42 Kadi bantu abu bàkaavwa bafikè mu citùpà cya baswè kushintulula ndongamu ewu. Bàvwa batàngile beena Pelèshètè, ne beena Amàlèkà, ne beena Amòlà, ne beena Hitì, ne makwabo matunga a pa buloba, ne bàvwa bamone ne bôbò abu bàvwa ne bamfumu bàvwà bàbàkookesha, ne bàbàlombola, ne bàbàludika, ne bàbàlwangeena mvita, ne bikwabo. Nenuku eci cìvwa cimwèke anu bu ne Izaleela ùvwa muswe kudyenza bu mùvwà bamfumu aba, ne bu mùvwà bantu aba.

43 Kadi kacya kabitukù byanjì kwenzeka ne, mu cikondo nansha cimwe, meeji a Nzambi ikalè bwa cisàmbà Cyèndè kwenzaci maalu bu mùdi bantu bàà pa buloba nansha, anyi bwa kulombodiibwabo anyi kukontononyiibwabo mùdi bantu bàà pa buloba. Cisàmbà cya Nzambi, bu mùtùbi misangu yònsò, citu anu cisàmbà cya—cya pabwàci, cisàmbà cishiilàngàne, cibiikidiibwe bwa kupatuka, citàpùlùke, ne biikàle anu menemene bashiilàngàne mu cyenzi cyabo, mu yabo ngenzèlù ya maalu, mu wàbò mushindu wà nsòmbelu, bishiilàngàne ne bìdi naabi bisàmbà bya pa buloba. Àbò majinga àdìbo naawu bwa bintu, ne cyònsò cidi wàbò pààbò mushindu wùdìbo benjìibwe, bitu misangu yònsò anu bibèngàngàne ne bintu bìdi bantu bàà pa buloba bàjìnga.

44 Nenuku beena Izaleela bàakalwa kùdi Samwèlè bàmba ne: “Mpindyewu, wèwè nyawu ukàadi wenda ukùlakaja, ne bàna bèèbè bàà balume pààbò kabàyi bènda mu njila webe.” Mbwalu, bôbò kabàvwa ne lulamatu bu mùvwà Samwèlè to. Bàvwa bangaci bàà mbwejilu ne bangaci bàà mfranga. Ki kwambabo ne: “Samwèlè, bàna bèèbè bàà balume kabeena mùdi wèwè to, pa nanku tudi baswe upatuke utupetele mfumu, ne umwele maanyi, ne utuvwije cisàmbà bu mùdi bisàmbà bikwabo bya pa buloba.”

45 Kadi Samwèlè kuteetaye bwa kubambila ne aci kacivwakù mwa kukumbana to. Kwambaye ne: “Nwènu benze aci, abidi mmale asatu mmìpi, nenumone ne yèyè neabiikile bàna beenu bàà balume bònsò balela ùbùùmusha ku mbanza yenu, ùbàvwija masalaayi, bwa kwikalabo bànyeema lubilu kumpala kwa dikalu dyèndè dya mvita, ne bàmbula bya mvita ne mafùmà. Kaciyi anu aci nkààyaaci to, kadi yèyè neabiikile bàna beenu bàà bakaji balela, bwa kubavwijaye booshi bàà mampà, ne ùbùùmusha kunùdi, bwa kwikalabo bàkafila byakudya kùdi bàà mu cilwilu. Kabidi,” mwakambàye, “pa kuumusha byònsò abi, yèyè neikalè

ùnúfucisha citadi kampanda, pa ntete yenu, ne pa byònsò binùdi nubweja bu makàsà. Neáfucishanganè citadi pa byònsò abi, bwa kufutaye mabanza kampanda a bukalenge, ne bikwabo, bìikalà ne cya kufuciibwa.” Kwambaye ne: “Ndi ngeela meeji ne, nudi nwenza ntùpàkànyì, anu yetu ya menemene eyi.” Kadi pàvwà . . .

46 Bantu kwambabo ne: “Kadi twètù tudi anu baswe kwikala mùdi bakwabo bantu.” Kùtu cintu kampanda kùdi balume ne bakaji, cidi cyènza ne mbaswe kwikala muntu mùdi mukwèndè. Kadi kùkaadikù muntu anu umwepele ne mwoyi pa buloba uvwa cileejilu cyetu, ùvwa ng’Ewu wàkatùfwila twètù bònsò awu, Mukalenge ne Musungidi wetù, Yesu Kilisto. Yèyè nguvwa cileejilu cipwàngàne cya civwà cikèngelà twètù kwikala, misangu yònsò anu mudifile ku maalu a Taatù, ne wènza cidi cijaalàme.

47 Kadi nansha mwàkateetà Samwèlè bwa kuswishisha bantu abu amu, bàvwa anu bàmulonda kabàyi balekela to, muunya ne bufuku ne: “Tudi baswe mfumu. Tudi baswe muntu. Tudi baswe muntu utùdiku mwa kwikala twamba ne: ‘Ki wetù mulombodi nyèyè ewu.’”

48 Kadi aci kacya kacitukù cyanji kwikala diswa dya Nzambi to. Kacivwakù diswa dya Nzambi, anyi kaciyadyakwikalaku diswa dya Nzambi to, bwa muntu ùkòòkesha mwìnendè. Nzambi ngudi ùkòòkesha pa muntu. Nzambi ngudi Mukookeshi wetù, Mfumu wetù.

49 Nenu cidi njuwu mikole, mikole be leelu ewu, bwalu muntu ùdi anu bu udi ne mmwenenu wumwèwumwè awu. Kabeena bàmwèka bu bàdiku mwa kuumvwa ne Nzambi ngucidi ùkòòkesha muntu to, pamutu pàà muntu ùkòòkesha muntu.

50 Pa nanku kudisungwilabo muntu dìnà dyèndè Shawùlà, uvwa mwànà wa balume wa Kishà. Ne yèyè awu ùvwa muntu mumanya ne ngwa kweyemenyiibwa, muntu wa kuneemekiibwa. Kadi yèyè ùvwa mukumbànyine bantu anu menemene, bwalu ùvwa muntu wa munene, mulemùle, wa luumu, wa mukici. Mifundu mmyambe ne yèyè ùvwa ne mutu ne makaaya kumutu kwa muntu kanà yònsò mu Izaleela. Ùvwa ne mmwenekelu wa mfumu, ne ùvwa ne kwísù kulenga. Ùvwa muntu wa meeji matwe ne wa pabwèndè menemene.

51 Mpindyewu, muntu wa mushindu awu ki udi bantu banangè bwa kusungula leelu ewu. Bantu kabeena bàmwèkakù bu basànkishùbwe kùdi mushindu wùdi Nzambi muteeke Ekeleeziya Wendè to, bwa kwikala mulombola ne mukòntonona kùdi Nyuma Mwimpè. Bòbò mbaswe kampanda, muntu kampanda, dingumba kampanda, bantu kampanda basungùlùke bwa kulombola Ekeleeziya. Mmùmwè ne, kî mbakùmjàne bwa kudyèla bòbò biine anu menemene mu cyanza cya Nzambi to, bwa kwikalabo bàà nyuma, bwa kulombodiibwabo kùdi Nyuma Mwimpè. Mbaswe muntu kampanda wa ùbènzela ntendeleelu,

muntu wa ùbàmbila anu menemene mushindu wà kucyenza, ne byònsò pa bìdi bitàngilà cyòci aci.

⁵² Pa nanku muntu ewu ùvwa ùmwèka wa mukumbanangane ne kaaba aku anu menemene, bwalu ùvwa muntu wa mamanya a mu mutu a dikema.

⁵³ Nenku mbifwanangane bikole be ne leelu ewu. Twètù peetu, tutu banangè kusungula bantu bàà mushindu awu, bwa kwikalabo bàkòntonona ekeleeziya yetu, bwa kwikalabo bàkòntonona Ekeleeziya wa Nzambi. Ncyèna ne kantu nansha kamwe kàndi naaku kàà kwamba bwa kucilwisha to, kadi anu bwa kutookeshaku cyanààna kaabwalu kampanda, kàà ne: kacylene, kacìvwa, ne kacyaadyakwikalaku diswa dya Nzambi to, bwa cya nanku kwikalaci kwòkò. Bidi bìkèngela bwa Nzambi àkookeshè cisàmbà Cyèndè, bwa kulombola muntu ne muntu pàà nkààyèndè.

⁵⁴ Pashiishe tudi tusangana ne mwine mwànà wa Kishà ewu, muntu munene, ne—ne mukici wèndè awu, ne wèndè. . . Ùvwa ùmwèka ne yèyè nguvwa ukumbànyina cisàmbà aci, bwa ne wèndè mùzàbì pambidi pèndè wùvwa mufwànyine kumwènèka mulenga. Ne cifulu cya butumbi pa wèndè mutu, ne bule bwine bùvwàye mupite bakwabo bantu bònsò, pàvwàye wènda apu, s'ùvwa mufwànyine kwikala cintu cya mushinga cya—cya menemene bwa bukalenge bwa Izaleela. Bwalu, bakwabo bamfumu, bàà makwabo matunga abu, bàvwa bafwànyine kudyambidila ne: “Tàngilàayi ne mmuntu kaayi wàwa!” Mùvwàbo bafwànyine kwikala bàmfunkuna minu bàmba ne: “Tàngilàayi kunu, mfumu munene utùdi nende! Tàngilàayi numone ne mmuntu munene kaayi udi kumutu kwetu!”

⁵⁵ Byènza ne dibungama bwa kubyamba's, kadi mushindu mwine wùdìbi bilelèlè leelu ewu mu ekeleeziya, mbanange kwikala bàmba ne: “Wetù mpaasata kî mmuntu wa lungenyi lubùlàkàne nansha. Yèyè mmuntu munene. Mmupete dipolome dyèndè mu Hartford,” anyi mu cilongelu kampanda cya cinène cya teoloji. “Ùdi ne mapolome kî mmàngi kî mmàngi anaayi a mu mwaba *kampanda ne kansanga*. Ne yèyè mmuntu mulenga be udi mumanye kusòmba ne bakwèndè munkaci mwa bantu.” Byònsò abi bìdi mwa kwikala anu bìmpè, ne kwikala ne kààbì kaaba. Kadi ngenzèlù wa maalù wa Nzambi bwa Ekeleeziya Wèndè nkulombodiibwa kùdi Nyuma Mwìmpè, ne kùdi Nyuma Wèndè.

⁵⁶ Kadi bôbò bàtu banangè kwikala bàmba ne: “Twètù tudi ne dingumba dinene ditùdi bàà mwómò edi. Twàkabanga kacya ku matuku a bampandanjila bàà kale, patùvwa banyààbanyà, bantu anu difùka, bakese menemene. Kadi patùdi twakulangana apa twàvulwàngànyì mu mushindu wà ne tukàadi tubadiibwa munkaci mwa mangumba a matàmbe bunene àdiku. Tudi ne bilongelu bya bitàmbe bwìmpè, ne bambi bàà batàmbe kwikala

balongè tulaasa. Tudi ne misùmbà ya bantu bàdi ne mwàdilu wa mutàmbe bulenga. Ne bantu bàà batàmbe kwikala ne mamanya a mu mitu bàà mu cimenga bàtu bàlwa mu dingumba dyetu twètù. Ne tutu tupeeshangana kàà pa luse. Ne tutu twenza byenzedi bìmpè, ne byònsò bya mushindu awu abi.” Kadi nansha kakese, Nzambi kiitabiku to, bwa mèmè kwamba dīyī dibi bwa byôbī abi, bwalu byònsò abi’s mbîmpè.

⁵⁷ Kadi, nansha nanku, kabyena anu diswa dya Nzambi bwa muntu kwikalaye ùkòòkesha muntu to. Nzambi, mu Dituku dya Mpenta, wàkatùma Nyuma Mwîmpè bwa kukookesha mu myoyi ya bantu, ne kukookesha mu nsòmbelu wendè. Kabìvwakù byelela meeji bwa muntu kwikalaye ùkòòkesha muntu nansha.

⁵⁸ Kadi twètù tutu banangè kwamba ciine aci. Ncintu cya dikema be patùdì mwa kwamba mutùdì bàà mu bulongolodi bunene bwa mushindu awu.

⁵⁹ “Wèwè udi mwena Kilisto anyi?” Ki mùmvwà mukafikè pa cyena-bwalu eci, pàmvwà mu lùpitàadì apu. Nenku mvwa mufwànyine kwela muntu lukonko ne: “Wèwè udi mwena Kilisto anyi?”

“Mèmè ntu wa mu *cikampanda-cikansanga*.”

“Wèwè udi mwena Kilisto anyi?”

“Mèmè ntu wa mu *cikampanda-cikansanga*.”

⁶⁰ Ki munganga mukaji mutekete kubwelaye ne kulwaye ku luseke lwà kalàalù, kùmvwà munkaci mwa kubala Bible aku, kadi yèyè ùvwa munganga mu—mupyamupya mu cisàsà amu. Ki kwambaye ne: “Wetwawu!” Yèyè ne: “Ngeela meeji ne wèwè kí Révérend Branham, udi mwab’ewu bwa diteeta dya mubidi mujimà awu.”

Mèmè kwamba ne: “Mmèmè.”

⁶¹ Ki yèyè ne: “Ndiku mwa kukuvinga nyima ne bwanga bwa alcool anyi, bwa kukufikisha ku didyumvwaku ndambu bìmpè?”

Mèmè kwamba ne: “Udi mwa kwenza nanku.”

⁶² Nenku pàvwàye ùmvinga nyima apu, kwambaye ne: “Wèwè utu wa mu dingumba dya ekeleeziya kaayi?”

⁶³ Ki mèmè ne: “Kaa, mèmè’s ndi wa mu dingumba didi ditàmbe kwikala dya kale didiku adi.”

Ki yèyè ne: “Ki dingumba kaayi diine adi?”

⁶⁴ Mèmè ne: “Ndìvwà dilongòlòdiibwe kumpala kwa buloba kulongolodiibwabu adi.”

⁶⁵ Yèyè ne: “Kaa,” mwàkambàye, “cinyi? Ncyèna ngeela meeji ne ndiku mumanye adi to.” Yèyè ne: “Mèmè ntu wa mu ekeleeziya *kampanda*. Ki bwòbù bulongolodi abu anyi?”

⁶⁶ Mèmè ne: “Tòhù’s, mandamu. Adi’s ndya kùkaadi anu bu bidimu nkama yibidi cyanàànà eyi, abu bulongolodi. Kadi ebu

bulongolodi bwòbù bwakabanga pàvwà mitooto ya mu dinda munkaci mwa kwimba pamwe, ne bàná bàà balume bàà Nzambi bèèla mbila ya disanka apu, pààkamònàbo dilwa dya Musungidi bwa kupikula bukwabantu apu.”

67 Ki kwanjiye kulekela dimvinga nyima. Ne mvwa mwinamine kakese, ku *elu* luseke, bwa inàbànzà awu wàmòna mwa kvinga. Ne yèyè ùvwa wa pabwìpi ne Corydon, kwìnshi eku. Twètù kuditwa mu muyiiki. Ki kwambaye ne: “Mukalenge, mèmè’s ntu misangu yònsò anu mwitabuuje ne bu Nzambi mwikàlekù Nzambi, Yèyè ùcìdi anu Nzambi, leelu ewu, anu mùvwàYe mu matuku a kale amu.” Yèyè ne: “Nansha mùdì wanyì ekeleeziya ùcibènga wòsha ne muni mwìkù amu, kadi mèmè ndi ngiitabuuja ne m’Bulelela.”

68 Ki mèmè kwamba ne: “Kwèna kule ne Bukalenge bwa Nzambi to, nsongààkàjì.”

Yèyè ne: “Pìikalàbi ne Yèyè ùvwa mwondopi, Yèyè kàcyèna anu mwondopi anyì?”

Mèmè ne: “S’ki cìdiYe bushuwa menemene, mwaneetu wa bakaji.”

69 Kadi muntu yèyè mmuswe kukookesha, ne kukookesha muntu. Ne muntu mmuswe bwa muntu amukookeshe. Kì mmuswe bwa Nzambi àkookeshè to.

70 Pa nanku mwànà wa balume wa Kishà ewu, Shawùlà, dìnà dyèndè, ùvwa menemene anu dyandamuna ku cìvwàbo bakèbe aci, muntu muleemùle wa kafyondo. Nenku. . . Kaa, yèyè ùvwa anu mwa kubalombola ku mvita yabo, ne bikwabo. Kadi, nansha nanku, kacìvwa anu mushindu wà Nzambi wà dyenza bintu to. Nzambi ùvwa muswe bwa muprofeta Wendè mukulakaji wa lulamatu awu abaludike, ne ìkalè ùbàmbila Mèyi Èndè.

71 Mpindyewu, leelu ewu, mu cikondo cyetu cya ekeleeziya cinène citùdi ne mwoyi eci, twètù, ndi ngeela meeji, ne ngiitabuuja cyòcì eci ne mwoyi wànyì wònsò ne, tukàadi baye menemene anu cyanza mwandamuna buumuke ku cìvwà Nzambi mututumine dīyi bwa kwenza. Mèyi a ndekeelu a Musungidi wetù àvwa mu Maako 16. M’Mwambe ne:

Ndàayi pa buloba bujimà, nuyiishe evanjeeliyo kùdì cìfukiiibwa cyònsò.

Ewu udi witabuuja ne ùbàtìiijibwa neasungidiibwe yèyè, . . . ewu udi kàyi wìtabuuja neapiiishibwe.

Nenku bimanyinu ebi nebifile bàdì bütabuuja: Mu dìnà dyànyì bóbò nebiipate baadémons; nebààkulè mu mwakulu mupyamupya;

Ne bu bóbò mwa kukwata nyoka ne byanza, anyì. . . kunwa. . . bintu bya bishebeyangana, kì mbifwànyine kubenzela bibi to; ne bóbò. . . batentèkèle babèèdì byanza byabo, . . . babèèdì nebasangale.

⁷² Kakwenaku muntu, kakwenaku mwânà wa Kishà nansha umwe, anyi nî nganyi mukwabo, udi mwa kupatula aci kakùyi ku bulombodi bwa Nyuma Mwîmpè to. Kadi twètù tudi baase tulaasa, tudi baase maaseminere, ne benzè malongolodi, bwa—bwa kusankishangana, ne bwa kufwanangana ne bakwabo bàà pa buloba.

⁷³ Mpindyewu, kale wàwa Nyuma Mwîmpè ùvwa Mulombodi mu ditunga edi. Kale wàwa ditunga edi òvwa òlombodiibwa pàvwà mu... pàakafùndàbo dîyì dya patooke dya dipàndà. Ne kùvwa nkwasà mukwabo wa pamutu muteeka mwaba awu. Kakwena mpatà nansha ya kânà mu meeji àànyì ne Mwânà wa Nzambi nguvwa usòmba ku meesa aku mu mwine nkwasà awu to, pàakiibakiibwà ditunga edi pa mèyi-makulu a budùikadidi bwa ntendeleelu ne budùikadidi mu byònsò, ciine aci pa bishimikidi bya Dîyì dya Cyendèlèlèlè dya Nzambi.

⁷⁴ Kadi twètù twányangì ciine aci. Cidiidì; twètù kwelela bantu tukanda bwa kwikalabo muntwamu, ku disùmba ne ku disùmbisha, ne milayi ya mafi. Mu mushindu wà ne... Ditunga dyetu, ne cidiidì cyetu, ne mungàlààtà wètù, bikaadi bibole byà dikema mu mushindu wà ne bikaadi—bikaadi bidìtelàkàjàngàne ne communisme ne tusumbu twa mishindu yònsò.

⁷⁵ Ne misangu yàbùngì tutu tubanga bisangilu ne disambila, pàdi nsangilu wa matunga ùdisangisha, ne kùtu... ànyì bwa kwenza miyiiki. Kadi mu cisangilu kampanda, cikondo cinène, abidi adi panshi aa, kakùvwa musangu nansha wumwe wà balòmbekù disambila to. Mmunyì mutwikalàku mwa kumana bwalu bwa tulumbùlumbù kakùyi disambila? Mmunyì mutùdiku mwa kutekemena, pa buloba bujimà, bwa kwenza cintu kanà cyònsò kakùyi bulombodi bwa Nyuma Mwîmpè?

⁷⁶ Kadi lekelaayi ngàm̀bèku bwalu ebu mwikàle ne dinanga ne kaneemu kùdì ditunga dyetu ne dibendela dyàdì, ne kùdì bukalenge bùdìdì dítwa nyama ku mikolo: Tukàadi babenge Mulombodi wètù, Nyuma Mwîmpè, ne ku cidiidì cibole tudi babwejemu bantu bàà meeji a kanyawu. Ne nwènù kanùyì batangile bìmpè to, nebiikalé mwa kwenza cimwe cya ku bilema bya njuwu bya kacya bènza bilema, mpindyewu mene, bwalu cisàmbà ncijingè bwa bantu bàkookeshè.

⁷⁷ Cidi citùkèngelà mu cimenga-cikulu cya États-Unis emu, bwa mfumu wa ditunga, cidi citùkèngelà mu Congrès, cidi citùkèngelà mu bibambalu byetu bya dikosa dya nsambù, mbantu bàdì balàmbùle nsòmbelu wabo kùdì Nzambi, ne bùle tente ne Nyuma Mwîmpè, ne balombòdiibwe kùdì bulombodi Bwèndè bwa Bunzambi. Kadi twètù, pamutu pàà cyòci aci, tudi tusungula bantu bàà mamanya a mu mitu, bantu bàdì ne “cimwenekelu cya difwana dya Nzambi, kadi biikàle bàvila Bukole bwa Nzambi,” bantu bàdì bàbènga kwitaba diikalaku

dya Nzambi, ne misangu mikwabo babi bapite ne apu, tudi bababweje mu bipaapu byetu bya cididi, bya ditunga dyetu.

⁷⁸ Kaciyi anu aci to, kadi mu ekeleeziya yetu. Ekeleeziya yetu yikaadi milwe mibole bwalu twetu, mu kusungula kwa balami beetu baà mikooko bwa kutulombola, tudi baye ku maaseminere bakasòbòle bantu baà mamanya a mu mitu banene baà mpolondo, bantu bàdi ne meeji matwe bikole, bantu bàdi ne mamanya matwe ngwengwengwe, ne bamanye menemene mwa kusòmba ne bakwabo munkaci mwa bantu, ne biikàle bantu banene mu nyungulukilu amu, biine abi mémè ncyèna ne cya dyamba bwa kubilwisha to. Bantu bàdi ne musangeelu mu mishindu yabo ya dyenda, baà mbàbi mu ngenzèlu wa maalu mu nsòmbelu wabo, ne mushindu wà kuditwala munkaci mwa bakwabo bantu, ne munkaci mwa bantu, bantu banene mu bipaapu byabo, bìndi nciyi ngamba díyi dibi bwa byòbi abi to. Nzambi kiitabiku bwa nyuma wanyì kwikalaye mubi mushindu awu to. Kadi, nansha nanku, kî ng'aci cidì Nzambi musungule bwetu twetu to.

⁷⁹ Mbulombodi bwa Nyuma Mwimpè: Kilisto mu myoyi ya bantu. Bààbúngì bàà ku bantu bàà mamanya a mu mitu bàdi bìimanà mu cyambilu cyetu abu's batu bàvila diikalaku dya cya bushuwa dya Nyuma Mwimpè. Bààbúngì bàà kùdìbo batu bàvila diikalaku dya dyondopa dya kùdì Nzambi ne dya Bukole bwa Nyuma.

⁸⁰ Mvwa mbala kaacintu kampanda, makeelela awu, ngeela meeji ùvwa mmakeelela, mulongolongo wà tupese twa bibejibeji tufumine kùdì Jack Coe, Jack Coe ufwile awu, yèyè wa... umwe wa ku bantu bàndi mukudimwishe mucima balwè kùdì Mukalenge Yesu, uvwa muntu wa bukole ne wa mushinga, mu dituku dyèndè awu. Bààkamubiikila bwa kulumbululaye, mu Floride, bwalu wàkalòmba mwànà mutekete kampanda bwa kuumushaye milonda yèndè ya balema ku mikolo, bwa yèyè kukosolwelaye pa cibumba cya ku cyambilu apu wènda wènda. Ne pààkenzàye nanku, mwànà awu kukosolwelaye pa cibumba cya ku cyambilu apu wènda wènda, anu bilenga, kadi kudishindaye pààkafikàye pàvwà mamwèndè ùsanganyiibwa. Bu mùvwà byònsò abi biikàle cintu cilongolola kùdì mwena lukuna wa Kilisto, mukaji mutekete ewu ne bayende kuyabo kafunda mwaneetu wa balume wa bukutu awu ku tubàdi twa ditunga adi.

⁸¹ Kadi pàvwàbi bikèngelakù bwa ekeleeziya ne ekeleeziya yònsò kwikalayi mitwe Mwaneetu Jack nyama ku mikolo, pàvwàbi bikèngelakù bwa mulume yònsò wa ekeleeziya udi utèèla Dìna dya Yesu Kilisto kwikalaye mwimane ku luseke lwèndè, ne bukitù bwònsò, pàvwàbi bikèngelakù bwa mulume yònsò udi usoka Dìna dya Mukalenge Yesu awu kwikalaye muye ku binù mu disambila, kadi, pamutu pàà nanku, mu mitu ya bwalu ya bibejibeji abi, dimwe dya ku mangumba etu manene

dyākamba ne bôbò bàākadyenza cimuku ne bantu bàdi bàbènga kwitaba diikalaku dya Nzambi, bwa kupiisha, ne kwelesha Mwaneetu Jack Coe mu bùlokò. Nudiku pèènù bafwànyine kudifwanyikijila ekeleeziya, biikàle bàdibiikila mu Dìnà dya Kilisto, mufwànyine kudyenza cimuku ne muntu udi ubenga kwitaba diikalaku dya Nzambi, bwa kupiisha muntu wa difwana dya Nzambi uvwa uteeta ne mwoyi wèndè wònsò bwa kutwa Bible nyama ku mikolo anyi? Kadi's bàākacyenza.

Ki dîbà adi Mwaneetu Gordon Lindsay kulwaye bwa kumusungila.

⁸² Nenu nzuji mwena bupidya awu pàākambàye ne: “Muntu ewu mmwibidi bwalu mmuumùshe milonda ya balema ku mikolo ya mwànà awu ne mumutùme bwa àkosolwelè pa cibumba cya ku cyambilu, ne mwambe ne yèyè ùvwa ‘mwondopiibwe.’ Ne yèyè mmudinge, ne mmwenze cintu cya cibèngangana ne mèyi matuma a ngangabuka, ki bwa cinyi yèyè mmumufunde bwa cilumbu cya diibila.”

⁸³ Ki Mukalenge Coe kujuukaye, kwambaye ne: “Mukalenge, ndi mèmè nkandameena dîyi adi. Nzambi mmwondope mwànà wa balume awu.”

⁸⁴ Ki nzuji awu kwambaye ne: “Ndi muswe kukonka muntu kanà yònsò udi ku tubàdi etu dîyi adi ní ndifwànyine kwikala dilelela, bwa ne Nzambi mmufwànyine kwondopa mwànà wa balume awu ku elu luseke lwà cibumba cya ku cyambilu, kadi kumushiya ùsaama ku luseke lukwabo. Dîyi adi bu dyòdì mwa kujaadikiibwa kùdì Bible, dîbà adi ndi ngamba ne Mukalenge Coe ùdi ne bukenji bwa kwamba dîyi dyèndè adi.”

⁸⁵ Ki mwambi kampana kwelaye cyanza muulu, kwambaye ne: “Wa kuneemekiiibwa, mukalenge, ndiku mwa kucyamba anyi?”

Ki nzuji kwambaye ne: “Amba.”

⁸⁶ Ki mwambi awu kujuukilaye kuulu, kwambaye ne: “Diloolo kampana, pa màyi a mbù àvwà àtwa kumpala àtwa paanyima, pàkaavwà kaabwàtù aku pabwipi ne kudiina kuya too ne panshi pàà màyi, ditekemena dyònsò dya kusungidiibwa dikaavwa diye. Kumonabo Yesu, Mwànà wa Nzambi, ùlwa wènda wèndela pa màyi. Ki umwe wa ku bapostolo, dìnà dyèndè Peetèlò, yèyè kwamba ne: ‘Awu ní ng’Wèwè, Mukalenge, tuma dîyi bwa ndwe Kùdì aku ngenda ngendela pa màyi.’” Ki kwambaye ne: “Mukalenge kwambilaYe mupostolo Peetèlò ne: ‘Lwàku.’ Ki kupatukaye mu bwàtù amu, mukalenge, wènda wènda bilenga’s anu mùvwà Yesu wènda amu, wènda wèndela pa màyi. Kadi pàākakwacikàye bwòwà, kubangaye kudiina kumpala kwa kufika kùdì Yesu.”

Nzuji kwambaye ne: “Aci cilumbu cyădikòsu.”

Bidi bitukengela bulombodi bwa Nyuma Mwîmpè, kî mbantu bàà mamanya a mu mitu to.

⁸⁷ Shawùlà, mwânà wa Kishà awu, díbà adi kuvwijiibwaye kapiteena kumutu kwa cisàmbà, ki kwangataye bantu binunu bibidi, ne Jonathan kwangataye cinunu. Ki Jonathan kupwekaye kùvwà cisumbu cya masalaayi eku e kutuutaye musùmbà wà beena Amònà, è, beena Amòlà's we. Nenku pàà—pàakamanàye kubatuuta, Shawùlà wàkeela mpungi, kwambaye ne: “Nudi numona cìdì Shawùlà mwenze's.” Kubangaye kuuja makaaya.

⁸⁸ Muntu ùdi wènza anu ùlwa Docteur mu Bunzambi, anyi ùpeta kaacintu kampanda kakese kalamika ku dínà dyèndè aku anyi, ùdi ùmba ùlwa, mu mushindu kampanda, cimanya-byònsò.

⁸⁹ Balume bàà Nzambi bàtu bantu badipwekèshe. Bantu bàà Nzambi bàtu bantu badipwekèshe. Wèwè mumone muntu wàmba mùdiye mupete Nyuma Mwîmpè, kadi ùbanga kuditapulula, bwa pa kutangila ne mèsù, kàyi ne Diitabuuja to, wàya eku wàya eku, ùteeta kwikala cintu kampanda cìdiye kàyi to, vùlukàayi anu ne, kî mmwakidile Mukalenge Yesu to.

⁹⁰ Pashiishe tudi tusangana ne mwena lukuna kulwaye. Nenku ùvwa muswe kubwela mu musùmbà mukese wà bantu bàà Nzambi awu, ne muswe kutonkona dísù dya dyabalume dya muntu mulume yònsò.

⁹¹ Ki cyòci aci cìtù mwena lukuna ùteeta bwa kwenza misangu yònsò, mbwà kutonkona mèsù ònsò abidi, bu yèyè ne mushindu, bwa bantu kabafiki ku dimona cìdibo bènza to. Cyòci aci ki cìdì Sataana ùteeta kwenzela mwena Kilisto yònsò leelu ewu, kumutonkona lumònò lwèndè lwà nyuma alu, bwa wàmòna mwa kwikala ùlonda anu cyumvwilu cya bintu bwa mamanya a mu mitu, kaciyi cyumvwilu cya Nyuma Mwîmpè udi umulombola awu to.

⁹² Nenku pààkenzàbo nanku, pààkalwà dicimuna dinene adi, díbà adi Shawùlà kusaayaye ngombe minene yibidi ne kuyituminaye cisàmbà cijimà. Nenku ndi muswe bwa numoneku kaaba aka ne, pààkatùmà Shawùlà bitùpà bya ngombe abi kùdì Izaleela mujimà apu, ne kwambaye ne: “Muntu yònsò wabenga kulonda Samwèlè ne Shawùlà awu, yèyè awu, ngombe ewu, yèyè awu ikalè bu mùdì *eci* emu.” Nudi numona museeswishanganyi mwàkateetaye bwa kudileeya yèyè mwine pàmwè ne mulume wa Nzambi awu amu anyi? Mushindu mwine—mushindu mwine wùvwàci kaciyi cya bwena Kilisto's we! Diciina dya bantu òvwa mbwà Samwèlè. Kadi Shawùlà wàkabàfikisha bònsò ku dimulonda yèyè mbwalu bantu bàvwa bàciina Samwèlè. “Bàlondè Samwèlè *ne* Shawùlà.”

⁹³ Ne mmisangu búngì kaayi, leelu wa Ndaaya ewu, yitùkaadi twètù aba bacyùmvmvwe! “Twètù mbàdì Ekeleeziya munene. Twètù mbàdì Ekeleeziya wa Kilisto. Twètù mbàdì Ekeleeziya wa Nzambi. Twètù mbàdì—mbàdì *cikampanda*.” S'cidi cifikisha

bantu ku dipeta diciina kampanda, ne ku dyela meeji ne ncyà bushuwa ne mwômò amu ki mùdì Nzambi ùkwàcìla mudimu. Nenku kabàyi bàswakù bulombodi bwa Nyuma Mwîmpè to. Bâtàmba kujinga bwa kulondabo bantu bàà mushindu awu, bwalu mbaswe kwikala ne nsòmbelu wabo bòbò sungasunga. Mbaswe kwitabuujà cìdìbo bòbò baswe kwitabuujà aci.

⁹⁴ Nudi numona anyi? Nyuma Mwîmpè ki Mulumbulwishi wetù twètù. Kacya Nzambi kàtukù mutupeeshe paapà kampanda, anyi mwepiskopo, anyi nî nganyi yònsò, bwa kwikalaye Mulumbulwishi nansha. Nyuma Mwîmpè, Mupersona wa Nzambi awu, mu mmwenekelu wa Nyuma Mwîmpè, ki udi Mulumbulwishi wetù ne Mulombodi wetù. Mpindyewu, bidi nanku bwa cinyi?

⁹⁵ Bu nwênù mwa kuswa fwayiku luse cyakwidi cikayabale, citàmbe kukayabala eci. Ncyèna ne meeji a kwikala ne lwonji to. Ndi ncyambidila ku dinanga.

⁹⁶ Kadi Nyuma Mwîmpè ùdi wàmba ne mbibi bwa bakaji beetu kukosabo nsuki yabo. Ne mbibi bwa bakaji beetu kuvwalabo tuputulu tukese atu ne mipanu, ne kulaaba tùpèntà ku mishiku ne kudilaaba bilaabu kwìsù. Nyuma Mwîmpè ngudi wamba ne mbibi.

⁹⁷ Kadi twètù tudi baswe bwa bantu kwikalabo bàtwàmbila ne mbîmpè ne: “Bu munùdì anu nundonda mèmè ne Samwèlè.” Mbaswe bwa kwikalabo ne nsòmbelu kampanda munda mwa matuku asambombo, mushindu wònsò wà nsòmbelu udibò baswe kwikala nende awu, kadi kuya mu ekeleeziya mu dyalumingu mu dinda. Ne mwabilaayi kampanda wa mamanya a mu mutu wa mu cilongelu citumbuke ne mapolome tente mu nzubu tente pambelu udi mwa kubayiisha kaadiyiisha kakese kùikalà mwa...ne ndambu wa mineku muntwamu, yidì mifwànyine kubasansakajaku maci ne kubacyonkomojaku, cyenzè mùdì ndongamu kampanda wa sèndèmâ anyi wa télévision. Ne kubenzela kaadisambila kakese, ne kubàaluja mu mààbò ne kaadikùbiibwa kàà—kàà mushindu kampanda bwa didisankisha dya mu bòbò ne bààmanyi kwenza ntendeleelu wabo. Aci kî ndiswa dya Nyuma Mwîmpè to.

⁹⁸ Nyuma Mwîmpè mmuswe bwa nwênù kwikala ne nsòmbelu wa difwana dya Nzambi, dituku dyònsò dya mu lumingu edi, ne bufuku bwònsò, nuditàpulula ne bintu bya pa buloba.

⁹⁹ Kadi ekeleeziya yèyè kàtu muswe aci to. Bòbò mbaswe muntu kampanda udi mwa—udi mwa kuumvwija Bible mu mushindu wùdìbo bòbò baswe kuMuumvwà awu. Kî mbaswe kuteeleja Dìyì dya Nyuma Mwîmpè mwikàle wàkwila ku Bible to. Bààbùngì bàà kùdìbo mbaswe kwikala bàmba ne: “Matuku a bishima àkaadi mamane kupita.” Ki cìdì cìsansakaja maci a bantu ncyòci aci. Mbaswe kwikala bàmba ne: “Dibatiiza dya Nyuma Mwîmpè kaditukù to.” Bantu kî mbaswe kwenza

maalu bishiilàngàne ne mùdì bakwabo bàà pa buloba bènza to. Kì mbaswe kupatuka mu mùsèèsù biikàle ne kwìsù kwowa màyi to, ne—ne bantu balume ne mpala musukula, kabàyi ne mici ya mfwanka ku mishiku, ne—ne bifwanka, ne bishiba bya mfwanka, ne—ne bintu bitu bantu balume bènza abi. Ne bakaji mbaswe bwa nsuki yabo yikalè mikosa ne miipidija bikole menemene, ne—ne bavwàle tunkanzu tukese, ne twikàle tùleeja mbùngakeenu wa mibidi yabo, ne bintu bìdìbo bôbô baswe abi. Bôbô—bôbô mbaswe bantu bàdì mwa kwikala bàbàmbila ne: “Abi mbîmpè.”

¹⁰⁰ Dìbà adi, diloolo kampanda, ki muntu mulume ulwàlwa ewu bwa kungambila ne, bwalu mvwa muyiishe ndwisha bya nanku awu ne, dingumba dinene kampanda, matwe ku ataanu, mbambe ne: “Netwèlè Mwaneetu Branham làà tùshaalè katùciyi ne cikwabo cya dyenza nende nansha cimwe to. Wèwè anyi neumushe mikaba ya mèyi ayi mu cyalu, uyilòmbela luse, anyi netukwele làà.”

¹⁰¹ Mèmè kwamba ne: “Mèmè nènshaalè mukwate ku cya Dìyi dya Nzambi. Nansha bangàte cyònsò cìndi naaci panu, mèmè nènshaalè ne Dìyi. Ne mèmè . . .”

Yèyè ne: “Ee, kabìvwakù bìkèngela bwa wèwè kuumusha mu cyalu mukaba wà mèyi *kampanda* anyi?”

¹⁰² Mèmè ne: “Mèmè kacya ncìtukù mwanjì kuyiisha cintu nansha cimwe, mu nsòmbelu wanyì, cínkaadiku muumvwile bundu nansha. Ncyèna ngumushaku mikaba ya mèyi anyi bìdì bikwàtapù abi to. Ndi nshààla ne cìdì Nyuma Mwîmpè wàmba. Ku cyôci aci ki kùndì ngiikadila ne mwoyi ne ki kùndì mfwila.” Mpindyewu ncyèna nteeta bwa kwamba bwanyì mèmè mwine to. Kadi ndi anu nteeta bwa kunupeesha cifwànyikijilu cya bìdì munkaci mwa kupitakana, bwa nwènù kumona ne kuumvwa. Bantu mbàdì baswe kulombodiibwa kùdì bantu.

¹⁰³ Kabàvwa baswe Samwèlè to. Pashiishe kumpala kwa kwelabo Samwèlè maanyi bu mfumu . . . ànyì Shawùlà, mfumu’s, numfwilaayiku luse, Samwèlè wàkalwa cyakabidi kùdìbo. Nenku nèngìikalè mwa kwakula anu mu ngaakwilù wa bu yèyè mufwànyine kwikala mwakule leelu ewu. Nudi mwa kucibalaayi. Yèyè wàkamba ne: “Bubi bùdiku bwa Nzambi kwikalaYe Mfumu wenù bùdì penyì?”

“Ee, Nzambi nyawu twètù katùyi tuMumona.”

¹⁰⁴ “Ee, mèmè’s ki muleeji wa mpala Wendè,” mwàkambà Samwèlè, “kacyapu mèmè ewu nkààdikù munwàmbile cintu kampanda cya mafi anyi? Kacya nkààdikù mwambe cintu kampanda mu ciprofeta cìdì kaciyi cyenzèke anu mùmvwà mwambe ne cìvwa mwa kwenzeka amu anyi? Ncìtukù munwàmbile Dìyi dya Mukalenge anyi? Ne ndi muswe kunukonka bwalu ebu: Kacya nkààdikù mulwe kunùdì munulombe mfranga yenu bu kàà pa luse anyi? Kacya nkààdikù

munwàngàte kantu nansha kamwe anyi? Kacya nkààdikù munutwadile cintu kampana cidi kaciyi EMU MMÜDÌ MUKALENGE WÀMBA anyi? Ne Nzambi ùtu mucishindike, musangu wònsò ne, cìvwa Bulelela.” Ki kutumaYe nkuba ne mvula (Nudi bamanye Mufundu awu, nwènù, mwaba awu mene.) bwa kujaadika ne Samwèlè ùvwa cikòlokolo cya Nzambi.

105 Nenku anu mùvwà Samwèlè ùleeja mpala mu mushindu mupwàngàne amu: Leelu ewu, Nyuma Mwímpè— Nyuma Mwímpè ngudi cikòlokolo cya Nzambi: cidi cyàmba anu menemene cidi Bible wàmba; cidi cìtabuujà anu menemene cidi Bible mwambe, ne cìikalà kaciyikù mwa kupangakanangana Nende to, nansha kakese.

106 Kadi bóbò bàvwa bàkèba muntu kampana wa mufwànyine kubambilaku bishiilàngàne. Kadi bantu kabààkapeta mushindu wà kwamba ne ciprofeta cya Samwèlè kacivwa cipwàngàne to. Bààkandamuna e kwambabo ne: “Samwèlè, byònsò byúkaadi mwambe mu Dìna dya Mukalenge abi, Mukalenge ùtu mwenze ne byènzekè anu mùtù wèwè mubyàmbè amu. Kakwena kalema nansha kamwe to. Kacya kùtukù mulwe kutùdi bwa kutulomba mfranga yetu bu ne nkàà pa luse to. Utu mudikolele anu wèwè mwine. Kacya kùtukù mutulombe bwa kukwenzela cintu cinène, cya pabwàci to. Utu wèwè mweyemene anu Nzambi webè, ne Yèyè ùtu anu mukusungilesungile ku maalu ónsò. Ne mèyi èbè mmalelela. Cyònsò cyúkaadi mwambe mu Dìna dya Mukalenge cìtu cyenzekezeke anu mùtù wèwè mwambe. Kadi nansha nanku twètù tudi takeba mfumu.”

107 Nudiku mwa kumona dipangakanangana adi anyi? Nudiku nwènù—nwènù mwa kumona budimu bwa—bwa dyabulu anyi, mùdìbu mwa kukwacila mudimu pa muntu? Pamutu pàà yèyè mulume anyi mukaji kudilekelelaku kùdi Nyuma Mwímpè, ne kuteeleja cidi EMU MMÜDÌ MUKALENGE WÀMBA, bwa nsòmbelu mukezuke, ngiikàdilù udi kàyì mukooyike, bwa nsòmbelu mushiilàngàne, cisàmbà cya pabwàci, ditunga dya cijila, cisàmbà cìvwa ne ngenzèlù wa maalu wa pabwèndè; kadi bóbò bàtàmba kujinga kukùmbanangana ne bàà pa buloba, ne bènza maalu bu bàà pa buloba, ne bàya ku ekeleeziya kampana udi wamba ne: “S”bìdi anu bìmpè, enza wèwè maalu anu mushindu awu, utungunuke uye anu kumpala.”

108 Nudiku mwa kumona ne bìdi cinyi anyi? Bàdi bàmba ne: “Cintu pààci ne ndyondopa kacitukù to. Kaa, dibatiiza dya Nyuma Mwímpè’s dívwa ànu tubalù twà biikaki bwa ekeleeziya.” Mu ngaakwilù mukwabo, dibà adi Nzambi kwangataYe bantu, kuumusha Nyuma Mwímpè mu ekeleeziya, ne kulekeelaYe dingumba bujitu bwa òmwibakè. Kacyapu, kacyapu. Cintu bu nanku kacitukù nansha. Nyuma Mwímpè, Dìyi dya Bulelela, ki dívwa ne cya kunulombola too ne pààlwà Yesu. Kadi mushindu awu ki—ki wàkayàbi’s.

109 Shawùlà kwangataye bukookeshi. Yèyè munene... Yèyè kupeta musùmbà munene wà bamulondi. Kaa, yèyè ùvwa ne bya mvita bilenga bya dikema. Ùvwa ne tungìmbà. Ùvwa ne ngabu, ne ùvwa ne mafùmà. Kaa, yèyè wàkatàmba matunga makwabo ònsò. Nenku kubabwejaye mu mungàlààtà kampanda wùvwà mutàmbe kule ne kule cyònsò cìkaavwàku nì nganyi nì nganyi muumvwe bàmba aci.

110 Nenku ki cyòcì aci cìdì mangumba etu ne ekeleeziya yetu myenze leelu ewu. Tudi ne bitanda bya ekeleeziya bya bitàmbe bunene pa buloba. Tudi ne bantu bàdì ne mvwàdilu wa mutàmbe bulenga pa buloba. Tudi ne dilonga dya ditàmbe kutumbuka òvwakù mwa kufidiibwa.

111 Byenzè mùvwà bantu balongeshiibwe bàà Shawùlà bàvwà bafwànyìne kwangata difùmà adi, ne bafwànyìne kukwata naadi mudimu ne kusempela naadi mu mushindu wà bàà bisàmbà bya bende bàfika ne ku dibaciina. Bàvwa cisàmbà cilongèshiibwe, ne byònsò. Kadi, òngà dituku, kulwakù cikondo cyakapàtukà mwedyanganyi wa tudyòmbò. Ki kusalulaci cilwilu cijimà cya Izaleela mu mushindu wà ne bààkashààla biimane, bàzakala too ne mu bisabaata. Goliyàtà kubeelaye kadyòmbò ne: “Piikalàbi ne Nzambi wenu awu ùdì cinùdì nwènù nwamba ne ncidìYe aci! Nwènù’s ki bàdì batàmbe kulongeshiibwa bilenga.” Ki kubeelaye kadyòmbò. Bòbò kadi ki kupangabo cya dyenza’s. Bya mvita byabo bilenga ne byengeleja abi, kabìciyi mwa kukumbanaku to. Mafùmà àbò kaàciyi mwa kukumbanaku to. Kùvwa cintu kampanda, munkaci mwa kwenzeka, cìvwàbo kabàyiku banjì kuumvwa kacya to.

112 Nenku ne kaneemu kònsò ne diciina dyònsò bya difwana dya Nzambi, ne ditwangana dya mushinga ne buneeme, ne dinanga ne bwobumwe bwa bwena Kilisto, ndi ngamba nunku: Mvwa mubalè, dituku adi, mu cibejibeji cya ku Afrike, mùvwàbo bàmba ne wetù mwànà wa Kishà, wetù mwedyanganyi wa kadyòmbò mu butangadiki, Mùzùlùmanyì kampanda pààkamwelàye kadyòmbò, Billy Graham. Bàmba ne: “Piikalàbi ne Nzambi webe awu ùdì Nzambi, Yèyè ondope’s babeedi mwàkambàYe ne Ùvwa mwa kwondopa amu.” Ki mwànà wa Kishà awu, ne bakwabo bàà mu cilwilu, kushààlabo matama bu byàtà kadi kuumukabo ne mu ditunga amu, bacìmùnnyìibwe. S’ncintu cya bundu. Nzambi wetù twètù ùdì Nzambi.

113 Twètù tudi ne ekeleeziya yetu mimpè. Tudi ne butangadiki bwetu bulenga. Tudi ne tungìmbà twètù tufuciibwe. Tudi ne korale ya mitàmbe bwimpè, tuleyì twa tutàmbe kutumbuka twa mu ditunga. Tudi ne bantu batàmbe bulenga, bamwe bàà ku bàdì ne mfranga mitàmbe búngì. Tudi ne beena mamanya a mu mitu. Tudi ne teoloji mutàmbe kutumbuka; tudi mwa kumuyiishangana; tudi mwa kumwambilangana. Tudi mwa kwenza butangadiki ne kubwejamu bantu, ne tubapeta miliyò

ne miliyô ku cidimu cyônsò, batùdi tukudimwisha micima, tubabweja mu ekeleeziya. [Katupa kàà mukaba wà méyi munda mutupu—Muf.] Tungimbà twètù tùdi tufuciibwe atu, butangadiki bwetu bwa mamanya a mu mitu abu, kabàyikù bamanye mwa kuumusha kadyòmbò bu nanku to. Kí mbamanye kantu nansha kamwe pa bwalu abu to. Kí mbamanye kantu nansha kamwe pa bìdi bitàngilà bukole Bwèndè bwa dyondopa to, dibatiiza dya Nyuma Mwímpè, bukole bùdi mwa kwangata mundidimbi wà muntu udi upunga ne lufu lwà kansere, ne kumushiya mudishikamine. Kí mbamanye kantu nansha kamwe pa byòbì abi to. Kabàtu balongèshiiibwe mu cipaapu aci to, mùvwà Shawùlà ne cisumbu cyèndè cikwàtakaja kùdi bantu aci.

114 Kadi anyìshaayi ngambileku cisàmbà cya Nzambi, ne nwènú bânà, bwa nwamonaku mwa kumanya ne Nzambi kênàku ùnùshìya kakùyì ntemu to.

115 Kàyikù mumanye to, Shawùlà awu, Shawùlà kàvwakù mumanye kantu nansha kamwe pa bwalu abu to. Kadi Nzambi ùvwa ne kaaDavidi kakese lwà paanyima pàà kakuna pààpa mu mwaba kampanda, uvwa yèyè kàyì ùdiisha mikooko ne bisoosa bibi bya cyena ntendelelu abi to. Yèyè ùvwa ùyilombwela kumpenga kwa màyi matalale ne mu mpàtà ya lutende lubishi. Yèyè ùvwa ùvùluka bikole mikooko ya tatwèndè. Ne bu cintu kampanda mwa kubwelamu lubilu, mwena lukuna kampanda, bwa kukwata wùmwe wà ku mikooko ya tatwèndè, yèyè ùvwa mumanye bukole bwa Nzambi bwa kusungila mukooko awu.

116 Nzambi ùcidikù anu ne Davidi kampanda, mu mwaba kampanda, udi mumanye ne kusungila kwa wùmwe wà ku mikooko ya Nzambi, ku Bukole bwa Nzambi mbwena kwamba cinyi. Yèyè ùcidikù anu mumanye byònsò pa cyòci aci.

117 Yèyè ùvwa mupete dyeyemena. Kàvwa mumanye kantu nansha kamwe pa bìdi bitàngilà bya mvita bya Shawùlà abi to, anyì kàvwa mene muswe nansha cimwe cya kùdibi to. Kàvwa muswe nansha dimwe dya ku mangumba àbò awu to. Kàvwa muswe bwa bya mvita bya kale abi kwikalabi pambidi pèndè to. Wákamba ne: “Ncyèna mumanye kantu nansha kamwe pa byòbì abi to. Kadi lekela nye mu Bukole bùndi mèmè mumanye abu.” Yèyè ùvwa mudiishediishe mikooko ya tatwèndè. Ùvwa mutabaleeletabaleele mpàtà ayi. Ùvwa muyipeeshepeeshe cyakudya cya mushindu mwímpè, ne yòyi yìvwa mishààle ne mwoyi ne mikolàkàne.

118 “Muntu kààkwikala ne mwoyi anu ku dyàmpà nkààyaadi to. Kadi ku Diyì dyònsò didi dipàtukà mukana mwa Nzambi, ki kwikadilà muntu ne mwoyi.” Mulami mulelèlà wa mikooko ngudi uyidiisha. “Yesu Kilisto umwèumwè awu makeelela, leelu, too ne kashidi.” Nenku mwena lukuna yèyè anu mukwate wùmwepelè, mu bubeedi, yèyè mmumanye Bukole bwa Nzambi.

119 Tàngilààyi kaaDavidì kakese aku, kiimàne mwaba awu. Kwambabo ne: “Mulumyana mmulwanganyi wa mvita, kacya anu ku dilediibwa dyèndè. Nenku kacya anu ku bwânà bwèndè, yèyè kî mmumanyeku cîngà cintu to anu difùmà ne bya mvita abi. Mmulongeshiibwe bilenga bya dikema. Mmwena teoloji pàdiye pààpa. Kadi wèwè kwèna mumanye kantu nansha kamwe pa bwalu abu to.”

120 Yèyè kwamba ne: “Bwa aci kaayi ncyà bushuwa, mukalenge. Ncyèna mumanye kantu nansha kamwe pa bidì bitàngilà dilongeshiibwa dyèndè dya mu teoloji adi to. Kadi kùdi cintu cimwepele cîndiku mèmè mumanye bushuwa, ncyà ne, pàvwà mwena lukuna ùlwa, bwa kwangata wùmwè wà ku mikooko ya tatwányi, mvwa nya ne Bukole bwa Nzambi. Mvwa ngùsùngila. Mvwa ngwàluja ne dikubiibwa dyònsò ku bukole bwa mubidi. Mvwa ngwàluja ku mpàtà ya lutende lubishi lwà mu ditalàjà ne ku màyi matalale. Nenku Yèyè Nzambi wàkampèèsha nyama wa ntambwe mu byanza byànyì awu, ne mèmè kumushebeya pààkangatàye umwe wa ku bânà bàà—bàà mikooko, ne Yèyè wàkampà mushindu wà kushebeya nyama wa ours awu, ki mwikalà Yèyè Nzambi wa mu Dyulu awu mwa kuya naanyi bwa kushebeya mwena Pelèshètè udi kàyi mutengula ewu.

Bulombodi bwa Nyuma Mwîmpè mbùdi bütükèngelà. Mèmè ncyèna mumanye matuku àanyi to; muntu nansha umwe kî mmumanye to.

121 Dinda dyàdyà mvwa mulààdile pa bulààlù bwányi. Ne mvwa. . .mvwa mulààle tulu, ki mèmè kuloota Joseph ùsaama, ne mvwa mumwambule bwa mèmè kumusambidila. Kadi pàngààkatàbulukà, ngàkatàcishiibwa bikole. Mèmè kwamba ne: “Ee, pàmwàpa Joseph neasaame.”

122 Dya ntangila nunku, kumpala kwányi, kùvwa kùpita kaamundidimbi kakese, kafiike, kàà diikala ditàmbe kuya ku difìkuluka. Kadi bìvwa bimweke anu bu ne ùvwa mmèmè. Ki mèmè kukàtàngila. Kadi paanyima pààku apu pàvwà pàlwa Muntu kampanda mutooke, ne ùvwa n'Yèyè. Mèmè kutuma mèsù kùdi mukàjàànyì, bwa kumona ní ùvwa mutabale, bwa mèmè kumuleeja, bu yèyè ne mushindu wà kumona cikeena-kumona aci. Kadi yèyè ùvwa muye mu tulù.

123 Mèmè kwamba ne: “Kaa, mfwilèku luse, Mukalenge. Kadi, aci's ncìvwà nsòmbelu wanyi. Byàkakèngela bwa Wèwè kumpuusa mu byònsò bìndiku mwenze. Dìbà dyònsò òvwà cintu kanà cyònsò mwa kwenzeka, mèmè mvwa ndyambidila ne Wèwè nguvwa ucyènza. Kadi ndi mfika ku dyumvwa ne Sataana nguvwa uteeta bwa kundama kule naaci.” Mèmè kwamba ne: “Bu Wèwè anu mwa kundombolaku.” Nenku pàmvwà ntangila apu, mèmè kumona mpala mutàmbe bulenga ùntù nciyikù mwanjì kumona muntu nende to. Yèyè ùvwa kumpala kwányi, mutangila paanyima. KujuulaYe cianza Cyèndè ne kukwataYe

cyànyì mèmè, ne kwasaYe Iwendu ùya mu *nunku* ewu. Ki cikeena-kumona aci kunguumukaci. Dyalumingu dyàshààdi edi, mu dinda, mvwa mubiike kumpala kwa díbà. Aci cívwa mu diisambombo, cikeena-kumona eci. Mu . . .

¹²⁴ Ntu misangu yònsò anu ne meeji àlubakana, ntu misangu yònsò anu ngeela meeji ku difwa. Bwalu, bu múnkaadi ne bidimu makumi ataanu, bidì ne, matuku àànyì kaàcyèna kabidi. . . ncívwa ngeela meeji ne àvwa mapitepìte búngì to. Nenku mvwa ndikonka cìmvwà mwa kwikala mu tèòfàní, mubidi wà mu dyulu awu. “Mbifwànyìnekù kwenza ne mmone balunda bàànyì bàà mushinga mukole abu ne, twàmbè ne, kaadifwima kakese katooke kàpicila pàndì apu, ngamba ne: ‘Ki Mwaneetu Neville uyààya wàwa,’ anyì, yèyè kàyìkù mufwànyìne kwamba ne: ‘Wetwawu, Mwaneetu Branham’ anyì? Nenku pààlwà Yesu, díbà adi mèmè mufwànyìne kwikala cyakabidi muntu.” Mvwa ngeela meeji awu misangu yàbùngì.

¹²⁵ Mvwa ndoota mwikàle nsanganyiibwa mu Wesete. Nenku mvwa ngenda mpicila mu mwaba mukese wùvwà tuumici twa armoises, ne mukàjàànyì ùvwa naanyì, ne tuvwa munkaci mwa kuloba mishipa ya màbundu. Ki mèmè kwimana ne—ne kuunzulula ciibi cya lupangu. Ne maulu àvwa malenga a dikema. Kaàvwa ne mmwenekelu wudiwù nende kuulu kwa cibandabanda eci ewu to. Àvwa a bleu, ne mavuba matooke bikole. Ki mèmè kwambila mukàjàànyì, kwamba ne: “S’bìvwa bikèngela bwa twètù kwikalaku mwaba ewu, kwine kwònsò aku’s, munanga wanyì.” Yèyè kwamba ne: “Bwa bânà’s, ki pàvwà pàkèngela bwa twètù kwikala, Billy.” Mèmè kwamba ne: “Aci’s ki. . .” Ki pàànyì ngumba ntabuluka.

¹²⁶ Mèmè kudyambidila ne: “Ndi ndoota be! Ndi ndikonka ne mbwà cinyì.” Ki mèmè kupwekesha mèsù, ne yèyè ùvwa mulààle ku luseke lwànyì.

¹²⁷ Ki mèmè kjuukila pa musààmù wànyì, mùkaadiku bààbùngì bàà kunùdì nwènù aba bacyènzèze amu, mèmè kuteekela mutu pa dibaya dya—dya kumutu kwa bulààlù adi, nenku mèmè kuteeka byanza paanyima pàànyì. Nenku mvwa mulààdìlepù mushindu *ewu*. Ki mèmè kwamba ne: “Ee, ndi anu ndikonka ne necìikalè cinyì, luseke lukwabo. Nyewu nkààdi ne bidimu makumi ataanu, pàànyì ncyànji kwenzaku cintu nansha cimwe. Bu ne mvwaku mwa kwenza cintu kampanda bwa kukwacisha Mukalenge’s, bwalu ndi mumanye ne ncyakwikala wa cifwaka to. Cyabibidi cimwe cya matuku àànyì cìkaadi ciyè, òwò makeke, anyì mapite pa cyabibidi cimwe. Bu mèmè mwa kushààla ne mwoyi too ne ku diikala ne bidimu búngì búvwà naabu beena famiye wanyì, kadi nansha nanku cyabibidi cimwe cya matuku àànyì’s cìkaadi ciyè.” Ki mèmè kuzakana. Nenku mvwa mulààdìle mwaba awu, mwikàle ndilongolola bwa kjuuka. Tukààvwa twipacila díbà mwandamutekete. Mèmè kwamba ne: “Ngeela meeji ne nènye ku ekeleeziya, mu

dinda emu. Dìyì dyôdì dimpate, ndi muswe bwa ngaateelejaku Mwaneetu Neville uyiiisha.”

128 Pa nanku mêmè kwamba ne: “Udi mutabale anyì, munanga wanyì?” Kadi yèyè ùvwa muye mu tulù tukole be.

129 Kadi ncyèna muswe eci cinùpità to. Ncinshintulule mêmè. Ncyèna mwa kwikala Mwaneenu Branham umwèumwè wa bwena ùmvwà awu to.

130 Ki mêmè kutàngila. Ki mêmè kuumvwa Cintu kampanda, citùngùnùke anu ne kwamba ne: “Wèwè’s ucidi anu ubangilakù. Kolesha diboko mu mvita. Tùngunukà wèwè anu ne kukolesha.”

131 Mêmè kushààla nkùpa mutu ndambu. Mêmè kudyambidila ne: “Ee, pàmwàpa mêmè ngudi anu udyambidila cyôci eci pàànyì cyanààna.” Nudi bamanye’s, muntu’s ùdi anu mwa kupeta didifwànyikijila kampanda. Ki mêmè kwamba ne: “Pàmwàpa mêmè ngudi anu mudifwànyikijile cyôci aci pàànyì cyanààna.”

Cyôci kwamba ne: “Kolesha diboko mu mvita. Tùngunukà anu ne kuya. Tùngunukà anu ne kuya.”

132 Mêmè kwamba ne: “Pàmwàpa mêmè ngwacyàmbì.” Ki mêmè kupayika mishiku munkaci mwa mènù, ne kuteeka cyanza ku mishiku.

133 Ki Cyôci cìlwalwà kabidi eci, cyàmba ne: “Tùngunukà anu ne kukolesha diboko. Wikala nanshà mumanye ne cìdì ku ndekeelu kwa njila ncinyì’s we!”

134 Ki kwenzabi anu bu ne mvwa mwa kuumvwa Graham Snelling, anyì muntu mukwabo kampanda, uvwa wimba musambu awu mushindu ewu (Bātu bàwimba kaaba aka, Anna Mae ne nwènù bônso aba.):

Ndi ne majiyà a kwetu ne mwoyi wùsaama, ne ndi njinga kumona Yesu.

Ndi njinga ngùmvwèku ngonga ya myadi ya yìlondangana ya ku cisabu ayi yidila bituulubituulu.

Ncifwànyìnekù kukenkesha mu kajila kàànyì ne ncifwànyìne kuumushaku bwòwà bwònsò.

Mukalenge, enzaku bwa ntape dîsù dyàmwàmwa dya ridô wa cikondo.

Nukàadi bumvwe bàwimba mu ekeleeziya emu.

135 Ki mêmè kuumvwa Cintu kampanda cyàmba ne: “Udi muswe kumonaku anu dyàmwàmwa dya ridô wa cikondo anyì?”

Mêmè kwamba ne: “Ncifwànyìne kungambulwisha bikole.”

136 Nenu mêmè kutàngila. Anu mu katanci kakese cyanààna, mêmè. . . mweyelu wùmwèpelè nkààvwa mubwele mu Kaaba kakese kampanda kàà matelu. Mêmè kutàngila paanyima, kadi ki mêmè wàwa, mulààle pa bulààlù. Ki mêmè kwamba ne: “Eci’s ncintu cya dikema’s.”

¹³⁷ Mpindyewu, ncyêna muswe bwa nwênù kwambulula cyôci eci to. Eci nkumpala kwa ekeleeziya wanyì mêmè, anyì mikooko yànyì yîndi ndiisha. Nansha byôbi ne civwa ncinyi, ní mvwa mu mubidi ewu anyì pabelu, ní civwa nditentemunyiibwa, kacivwa bu mùtù cikeena-kumona cyônsò cínkaadiku mumone eci to. Mvwa mwa kutangila Mwàmwa, ne mvwa mwa kutangila apa.

¹³⁸ Nenku ndi mwenze anu ndyata mu Kaaba kakese aku anyì, kacya ncitukù mwanjì kumona bantu búngì naka bènda bàlwa, bèèla mbila mikole ne: “Kaa, mwaneetu wa mushinga mukole!”

¹³⁹ Ki mêmè kutangila. Nenku nsongàakàjì, pàmwäpa ne bidimu ku mbangilu kwà makumi abidi ne byà mu njila, anyì dikumi ne mwandamukulu too ne ku makumi abidi, biikàle bängeela maboko kunshingu, bèèla mbila mikole ne: “Mwaneetu wa mushinga mukole!”

¹⁴⁰ Ki nsongàalùmè yilwalwà eyi, mu nsòkà ya busongàalùmè bwàyì. Ne mèsù abo àbàlakana ne mafwanangane ne mitooto mu bufuku bwa mîdimà. Mênù abo matooke zeezeze bu mabwe a busàngà. Nenku bàvwa bèèla mbila mikole, ne bängeela bitupà, bèèla mbila mikole ne: “Kaa, mwaneetu wa mushinga mukole!”

¹⁴¹ Ki mêmè kwimana, mêmè kutangila. Nenku mvwa mwànà mutekete. Mêmè kutangila paanyima mubidi wànyì mukulakaji awu mulààle kwàka, ne byanza byànyì bitèèka paanyima pàa mutu. Ki mêmè kwamba ne: “Ebu bwalu ncyêna mbuumvwaku to.”

¹⁴² Nenku nsongàakàjì eyi munkaci mwa kungeelà maboko kunshingu. Mpindyewu, ndi mumanye ne mwaba ewu ngwà bateeleji basambàkàne, kadi ndi ngamba eci ne kalolo ne bupole bwa Nyuma. Bantu balume kabeena mwa kwela bantu bakaji maboko kunshingu kabàyikù bumvwa masansakata a bulume to; kadi aci kacivwa Mwàmwa to. Kamùvwa ní mmakeelela ní mmàalabà to. Kabàvwa bàcyòka to. Bàvwa . . . Kacyakacya ncitukù mwanjì kumona bakaji balenga naka to kacya bandela. Bàvwa ne nsuki mibapwekele too ne mu cifuka, jipè mile too ne ku makàsà. Kadi bàvwa anu banguupukila. Kacivwa nansha dinguupukila dya bwena dya mwakunyaànyì wa bakaji wa taawu wa maawu, udi musòmbe pàapa wàwa, mufwànyine kunguupukila to. Kabàvwa bàntwà mishiku to, ne mêmè ncivwa mbàtwa mishiku to. Civwa ncintu cîndi mêmè—mêmè ewu nciyikù mupetele mya—myaku to, nciyikù mupetele mya—myaku bwa kucyamba to. “Bupwàngàne” kî ncifwànyinekù kukafikapu to. “Cilengèle-lèngèlèè” kî ncifwànyinekù nansha kafikapu to, nànsa kakesè. Civwa ncintu cîmvwàku mêmè ewu nciyikù kacya . . . Bikèngela anu bwa wikalèMu.

¹⁴³ Ki mêmè kutangila mu *nunku*, ne mu *naka*. Kadi bàvwa bàlwa, binunu ne binunu. Ki mêmè kwamba ne: “Ebu bwalu ncyêna mbuumvwaku to.” Mêmè kwamba ne: “Ee, bàdi . . .”

144 Kadi ki Hope ulwàlwa ewu. Yèyè nguvwa mukàjàànyì wa kumpala awu. Kulwaye lubilu, kadi kàyi wàmbakù ne: “Bayaanyi” to. Yèyè kwamba ne: “Mwaneetu wa mushinga mukole,” nenku pààkanguupukilàye apu, kùvwa muntu mukaji mukwabo mwimane mwaba awu, ukààvwa munguupukile pèndè, ki pashiishe Hope kuupukilaye mwine muntu mukaji awu; kuupukilanganabo ewu ne ewu. Ki mêmè kudyambidila ne: “Kaa, eci cidi ne cya kwikala cintu cishìilàngàne. Kacyena mwa kwikala . . . Kùdi cintu kampanda . . .” Mêmè kudyambidila ne: “Kaa, ndiku mufwànyìne kuswa bwa kwalukila cyakabidi ku cibidibidi cya kale cyàcya anyi?”

145 Mêmè kukenzakana dībà adi. Mêmè kudyambidila ne: “Ncinyì eci?” Ki mêmè kutangila, kutangila bîmpè menemene. Ki mêmè—mêmè ne: “Ebu bwalu ncyèna—ncyèna mwa kubuumvwaku to.” Kadi Hope ùvwa ùmwèka yèyè anu bu udi, kaa, bu mwenyi wa cisakà’s. Kàvwa mushìilàngàne to, kadi anu bu mwenyi wa cisakà.

146 Ki dībà adi mêmè kuumvwa Diyì divwà dyakùle naanyi, divwà mu cibambalu amu adi, dyàmba ne: “Cyùvwà muyiishe ne n’Nyuma Mwîmpè aci kadi ki cyôci eci. Ki Dinanga dipwàngàne ndyôdi edi. Ne cintu nansha cimwe kacyenaku mwa kubwela Muneemu emu kaciyi naaDi to.”

147 Mêmè ndi mupangadike, bitàmbe ne kwònsò eku mu nsòmbelu wanyi, bwa ne bidi bikèngela Dinanga dipwàngàne, bwa kubwela Mwômò amu. Kamùvwakù mukawu to. Kamùvwa dicyoka to. Kamùvwa lufu to. Bubeedi kabùvwakù bufwànyìne kudyataMu to. Cifwaka kacìvwakù—kacìvwakù cifwànyìne kukuvwiya mukulakaji to. Nenku. . . Kabàvwakù bafwànyìne kudila myadi to. Cìvwa anu disanka pa dyôdi.

148 “Kaa, mwaneetu wa mushinga mukole!” Ki kuyabo naanyi kuulu, ne kunsòmbeshabò pa mwaba mutumbuke munene menemene.

149 Mêmè kudyambidila ne: “Ncyèna munkaci mwa kuloota to. Ndi munkaci mwa kutangila paanyima mubidi wànyì—wànyì mulààle pa bulààlù apa.”

150 Ki kunsòmbeshabò kuulu aku. Ki mêmè kwamba ne: “Kaa, kabìvwa bikèngela bwa mêmè kwikala musòmbè kuulu eku to.”

151 Kadi ki bakaji ne balume bàlwalwà aba, bàfùmìna ku nseke yònsò yibidi, anu mu nsòkà yàbò ya bunsongà menemene, bèèla mbila mikole. Nenku muntu mukaji kampanda ùvwa mwimane mwaba awu, ki kwelaye lubila lukole ne: “Kaa, mwaneetu wa mushinga mukole! Kaa, tudi ne disanka dîngì be dyà kukumona Mwab’ewu.”

Mêmè kwamba ne: “Ebu bwalu ncyèna mbuumvwaku to.”

152 Ki dībà adi Diyì dya bwena divwà dyàkulà adi, dyàkwila kumutu kwànyì aku, kwambaDi ne: “Udi mumanye’s, mbafunde

mu Bible ne baprofeta baakasangishiibwa pamwe ne bàà kwabo.”

Ki mêmè ne: “Eyowa. Ndi mvuluka aci mu Mifundu.”

Dyôdi ne: “Ee, apa mpawàsangishiibwà pamwe ne bàà kwenu.”

Mêmè ne: “Dîbà adi nebiikalè bàà cya bushuwa, ne mêmè ndi mwa kubalenga’s.”

“Kaa, eyowa’s.”

¹⁵³ Mêmè ne: “Kadi, s’nyawu bàdi miliyô. Ba-Branhams kabàtu bûngì nanku to.”

¹⁵⁴ Ki Dîyì adi kwambaDi ne: “Abu kî mba-Branhams to. Abu mbawàkakùdimwishà wèwè mucima. Abu mbawàkalombolà kùdi Mukalenge.” Ki kwambaDi ne: “Bamwe bàà ku bakaji bàdi mwab’awu abu, baùdi udyambidila ne mbalenga kwisù abu, bàvwa ne bidimu bipite pa makumi citeema pawàkabàlombolà kùdi Mukalenge. Kabyena bikemesha to pàdìbo bèèla mbila mikole ne: ‘Mwaneetu wa mushinga mukole!’ apu.”

¹⁵⁵ Ki kwelabo lubila lukole, bônso cyapamwe, bàmba ne: “Bu ne kùvwa muye to, nunku twètù aba katùvwa mwa kwikala Mwab’ewu to.”

Mêmè kuzakana. Mêmè kudyambidila ne: “Ee, ncyèna anu mbyumvwa to.”

Mêmè kwamba ne: “Kaa, Yesu ùdi penyì? Ndi musweku kuMumona, bibi be.”

¹⁵⁶ Kwambabo ne: “Bwa mpindyewu, Yèyè ùdi anu kuulu ndambu, anu lwà kuulu bu uyààya *kwàka*.” Bôbò ne: “Dìngà dituku Yèyè nealwe kùdi.” Nwamonu anyì? Bôbò ne: “Wèwè ùvwa mutumiibwe, bu mulombodi. Nenu Nzambi nealwe. Ne pààlwàYe, neAkulumbulwishe bilondèshile biwàkabàlongeshà, dyambedi, ní bàbwela anyì ní kabàkubwela. Twètù netubwele bilondèshile dilongesha dyebe wèwè.”

¹⁵⁷ Mêmè kwamba ne: “Kaa, ndi ne disanka dyàbûngì be. Pòlò ùvwa, bìdi bikèngela bwa kwimanaye mushindu ewu anyì? Bidi bikèngela bwa Peetèlò kwimanaye mushindu ewu anyì?”

“Eyowa.”

¹⁵⁸ Mêmè kwamba ne: “Dîbà adi mêmè’s ndi muyiishe Dîyì dyônso didìbo bôbò bayiishè. Kacya ncitukù museesùkeKù to, ní nku elu luseke ní nku lukwabo. Mwaba wùvwàbo bôbò babàtiize mu Dîna dya Yesu Kilisto, mmùndi mêmè pàanyi mubatiize. Mwaba wùvwàbo bôbò balongeshe dibatiiza dya Nyuma Mwimpè awu, ncìndi mêmè pàanyi mulongeshe. Cyônso cyàkalongeshàbo bôbò aci, ncìndi pàanyi mulongeshe.”

¹⁵⁹ Ki bantu abu kwelabo lubila lukole, kwambabo ne: “Tudi bamanye aci. Ne tudi bamanye ne netwalukile pamwe neebe, dîngà dituku, pa buloba.” Kwambabo ne: “Yesu nealwe, ne

wêwê neulumbulwishiibwe bilondêshile Dîyi diwàkatüyiishà. Ne pashiishe wêwê mwitabiibwe dîbà adi, bwalu wêwê newitabiibwe,” ki bôbò ne, “dîbà adi neutuleeje kùdiYe, bu bivulukilu byèbè bya mudimu wèbè wà bwambi.” Bôbò ne: “Wêwê neutulombole kùdiYe, nenku, bônsò pamwe, netwalukile pa buloba, bwa kusòmbelapù kashidi.”

Mêmè kwamba ne: “Bikèngela ngaalukile mpindyewu anyi?”

“Eyowa. Kadi tungunuka ne kukolesha.”

¹⁶⁰ Mêmè kutangila. Ne mvwa mwa kumona bantu, anu kacya bangatangana too ne kùvwa mèsù àshiikila aku, biikàle anu bènda bàlwa, bàswa bwa kunguupukila, bèèla lubila ne: “Mwaneetu wa mushinga mukole!”

¹⁶¹ Anu dîbà adi ki Dîyi kampanda kwambaDi ne: “Cyònsò cyûkaadiku munange, ne cyònsò cikaadiku cikunangè, Nzambi wakupeeshibi Mwaba ewu.” Ki mêmè kutangila. Ki mbwa wanyì wa kale ulwàlwa ewu, wènda ùlwa kùndi. Ki kabalù kàànyì kàlwalwà aka, ne kunteekaku mutu pa dikaaya, ne kupumaku. KwambaDi ne: “Cyònsò cyûkaadiku munange, ne cyònsò cikaadiku cikunangè, Nzambi wakupeeshibi mu cyanza, ku mudimu webe wà bwambi.”

Ki mêmè kudyumvwa ngenda nguumuka mu Mwaba mulenga awu.

¹⁶² Ki mêmè kukenzakana. Mêmè kwamba ne: “Udi mutabale anyi, munanga wanyì?” Yèyè ùcìvwa kacya anu wàya mu tulu.

¹⁶³ Ki mêmè kudyambidila ne: “Éyi Nzambi! Kaa, nkwàcìshèku, Éyi Nzambi. Kundekediku ndya cibanga pa bìdi bìtàngila Dîyi nansha dimwe to. Nshaale anu mululame pa Dîyi adi, ne nDiyiishè. Bibandè anyi bipwekè, cidi ní nganyì ní nganyì wènza; nansha kujuukè ba-Shawùlà búngì munyì. . . bàna bàà Kishà, nansha *bikampanda*, *bikasanga*, anyi *bikankenga* bijuukè búngì munyì. Anyishàku, Mukalenge, nkoleshè nye too ne ku Mwaba wàwa.” Bwòwà bwònsò bwa lufu. . .

¹⁶⁴ Ndi ngamba nanku, mwikàle ne Bible wanyì kumpala kwànyì, mu dinda emu. Ndi ne mwànà mutekete wa balume mwaba wàwa, wa bidimu binaayi, wa dikolesha. Ndi ne mwànà wa bakaji wa bidimu citeema; ne nsongà, ùndi ne kusakidila bwa bwalu bwèndè, udi mukudimukile mu njila wa Mukalenge. Nzambi, enzaku bwa ngiikalè ne mwoyi, bwa ngaabàkoleshilaku mu mibelu ya Nzambi.

¹⁶⁵ Ne pa kuumusha cyòci aci, buloba bujimà mbyenze anu bu ne bàdi bèèla lubila lukole kùndi, bakaji ne balume bàà bidimu makumi citeema, ne bàà mishindu yònsò ne: “Bu ne kùvwa muye to, twètu aba katùvwakù mwa kwikala Mwab’ewu to.”

¹⁶⁶ Nenku Nzambi, anyishàku nkoleshè diboko mu mvita. Kadi pàkaadibi ne ki lufu ndwólò elu, mêmè ncyènàku nshààla kabungàme to. Ncifwànyine kwikala disanka, ncifwànyine

kwikala cya cyènza mulòwù, bwa kubwela, kuumuka mu dibola edi ne bundu ebu.

¹⁶⁷ Bu ne mvwaku mwa kwenza, muulu mwàmwa, kilòmèetà miliyò binunu lukama ne makumi ataanu, cipaapu cya nseke yinaayi, nenku ki Dinanga dipwàngàne ndyòdi dyàdya, cidya cyònsò mu nunku ewu, bìdi bìbùmbakana, too ne mutùdi tupweka mu mwaba wutùdi tusanginyiibwa mpindyewu ewu. Ncifwànyine kwikala anu mundidimbi naka wà dibola, kaacintu kakese katùdi mwa kuumvwa mu meeji aku ne kuumvwa ku dilenga ne kùdi cintu kampanda mu mwaba kampanda. Katwena tumanya ne Cìdi ncinyi to.

¹⁶⁸ Kaa, nwènù balunda bàànyì bàà musinga mukole, bananga bàànyì, bananga bàànyì mu Evanjeeliyo, bânà bàànyì bàndì mulelele Nzambi, ntèèlejaayi, mèmè mpaasata wenu. Nwènù, mvwa mwa kujinga ne kwikalakù mushindu kampanda wà kunuumvwijaci. Kakwena myaku miine to; ncyèna mufwànyine kuyipeta to; kayeena yìsanganyiiibwa mwaba nansha wumwe to. Kadi anu dyàmwàmwa dya mweyelu wà ndekeelu ewu, ki kùdi cintu cya citàmbe kwikala cya butumbi cinùdi kacya kanùyikù. . . Kakwena mushindu wà kucyumvwija to. Kakwena mushindu to. Ncyèna anu mwa kucyumvwijaku to. Kadi cyònsò cyùdi wenza, wèwè mulunda wanyì, teeka ku luseke bikwabo byònsò too ne paùdi upeta Dinanga dipwàngàne. Fikà kaaba kàà ne udi mwa kunanga bantu bònsò, mwena lukuna yònsò, bikwabo byònsò.

¹⁶⁹ DikamwènekelanganaMù dimwepele adi, bwànyì mèmè, ndimvwije muntu mushiilàngàne. Ncyènàku nansha kakese, nansha kakese, nansha kakese mwa kwikala Mwaneenu Branham wa mwomumwe wa bwena ùmvwà awu to. Nansha bu ndèkè mwa kutekakana, nansha bu mikenyi mwa kwela, nansha bu mutentekedi mwa kunteekela cingoma bwa kungaasa, nansha ciikàle cinyì, kacyna cyènza bwalu to. Mèmè nènkoleshè anu diboko mu mvita, ku ngàsà wa Nzambi. Bwalu, ndi muyiishe Evanjeeliyo kùdi cifukiibwa cyònsò ne kùdi muntu yònsò ùndìku pàànyì mwa kuyiisha awu, mwikàle mbaswisha bwa kuya ku Buloba bulenga bwa dyàmwàmwa abu.

¹⁷⁰ Bìdi mwa kumweka bikole. Bìdi mwa kulomba dikanda dyàbùngì. Ncyèna mumanye ne nntanta bule kaayi to. Katwena bamanye to, bwa mudibi ewu. Ku. . . Ku diteeta dyànyì dya dituku adi adi, yéyè ùvwa mwambe ne: “Wèwè uciidi ne bidimu makumi abidi ne bitaanu bya mwoyi wà usùmakaja mènù, mwìmpè. Wèwè udi mukolakane.” Aci ncinkwacisheku. Kadi, kaa, kacivwa aci to. Kí ng’aci to. Ncintu kampanda munda emu. Bìdi bikèngela bwa dibola edi diwàlè dibènga-kubola. Cya cifwaka eci bikèngela cìwvalè dibènga-kufwa.

¹⁷¹ Bânà bàà Kishà bàdi mwa kuuuka. Ndi. . . Bintu bìmpè byònsò bidìbo bènza abi, ncyèna ne bwalu bubì bündiku mwa

kubyamba to, dipèèshà dya bapele bintu ne dipeeshangana dya kàà pa luse. Kadi vùlukàayi, mona's, Samwèlè wàkambila Shawùlà ne: "Wèwè newāmbè pèèbè ciprofeta." Ne bààbūngì bàà ku bantu abu mbayiishi banene, bàà bukole, biikàle mwa kuyiisha Diyì bu bārkanjèlò. Kadi nansha nanku kacivwa anu diswa dya Nzambi to. Bivwa bikèngela bwa Nzambi kwikalaYe wabò mfumu. Wèwè mwaneetu wa balume, wèwè mwaneetu wa bakaji, lekela Nyuma Mwímpè akulombole.

Twinyikàayaaku mitu yetu bwa katanci kakese cyanààna.

Ndi ne majiyà makole a kwetu ne mwoyi wusaama . . . ne ndi njinga kumona Yesu,
Ndi njinga ngūmvwèku ngonga ya myadi ya yilondangana ya ku cisabu ayi yidila bituulubituulu;

Ncifwānyinekù kukenkesha mu kajila kàanyi ne ncifwānyine kuumushaku bwôwà bwōnsò;
Mukalenge, enzaku bwa tutape dīsù dyām wāmwa dya rīdō wa cikondo.

Mukalenge, enzaku bwa ntape dīsù dyām wāmwa dya rīdō wa tunyinganyinga ne bwôwà,

Enzaku bwa mmone ditunga dīdi dibàlakanà ne nsèsà ya dībà adi;

Ncifwānyinekù kukankamika diitabuuja ne ncifwānyine kuumusha bwôwà bwōnsò;

Mukalenge, enzaku bwa bātape dīsù dyām wāmwa dya rīdō wa cikondo.

¹⁷² Ndi mutwishiibwe, Mukalenge, bu ne ekeleeziya mukese ewu, mu dinda emu, ùvwakù anu mwa kutapa dīsù dyām wāmwa dya rīdō: kakùyikù tunyinganyinga munkaci mwabò to, katùvwakù tufwānyine kwikalaku to; bubeedi nansha bumwe; kakùyikù cingà cintu to anu bupwàngàne. Ne cidi anu mweyelu wūmwèpelè cyanààna pankaci pàà mwab'ewu ne Mwômo amu, pàà bukulakaji ne bunsongà, pàà cikondo ne Cyendèlèlèlè, pàà dyelakana dya mālābà ne tunyinganyinga twa makeelela, too ne ku cikondo cya mpindyewu cya Cyendèlèlèlè mu bupwàngàne.

¹⁷³ Ndi ndomba, Nzambi, bwa Wèwè kubeneshaku muntu yōnsò mwab'ewu, pīikalàku mwab'ewu, Mukalenge, bàdì kabāyi baKumanye mu mushindu awu wà Dinanga. Ne mu bulelela, Taatù, cintu nansha cimwe kī ncifwānyinekù kubwela mu Mwaba wa cijila awu kaciyi ne Dinanga dya mushindu awu to, Dilediibwa dya cyakabidi, kwikala mulediibwe cyakabidi. Nyuma Mwímpè, Nzambi, ùdi Dinanga, ne twètù tudi bamanye ne aci ncilelela. Nansha twètù tutentemuna mikuna ku diitabuuja dyetu, pīikalābi ne tukāadi benze bintu binène, nansha nanku, kakūyi Cyōci aci to, katwenaku bafwānyine kubānda cibāndilu cinène aci mwāmwa to. Kadi ne Cyōci aci,

neCitutuntumune kumutu kwa maalu àdì àtácisha a pa buloba aa. Ndi ndomba, Taatù, bwa Wèwè kubeneshaku bantu bàdì kaaba aka aba.

¹⁷⁴ Nenku swaku, bwa ne, muntu yònsò wanteeleji, mu dinda emu, ngamba Bulelela ebu awu, bwa Wèwè kwikala ntemu wanyì, Mukalenge, bu Samwèlè wa kale awu ne: “Kacya nkààdikù mubāmbile cintu kampana mu Dîna Dyebe cìwà kaciyi cilelela anyi?” Bòbò ki banzujì. Nenku ndi mbambila mpindyewu, Mukalenge, bwa ne Wèwè udi muye naanyì ku Buloba abu. Ne Wèwè udi mumanye ne ncilelela.

¹⁷⁵ Nenku mpindyewu, Taatù, kwòkò kwikàle bamwe bàdì kabàyi baKumanye to, swaku bwa edi diikalè dîbà dyàmbàbo ne: “Mukalenge, teekaku munda mwànyì diswa didì ne cya kwikala diswa Dyèbè Wèwè.” Enzaku nanku, Taatù.

¹⁷⁶ Nenku mpindyewu, nwènù, ne mitu yenu miinyika, swayi nwèlèku byanza byenu muulu, nwamba ne: “Nsambidilèku, Mwaneetu Branham, diswa dya Nzambi munda mwànyì.”

¹⁷⁷ Mpindyewu wèwè paùdì mwaba mene wùdì awu apu, anu bituulubituulu menemene, bwa cinyi kùyikù wambila Taatù ne: “Nzambi, munda mwa mwoyi wànyì leelu ewu, ndi ndekela maalu ónsò a pa buloba. Ndi ndekela byònsò, bwa kuKunanga ne kuKukwacila mudimu, matuku àànyì ónsò a mwoyi. Nenku, kubangila ku dituku edi, kubangila apa, nènKulondè, mu Mufundu wònsò wà Bible Webè?” Pawikalà kùyi mubatijiibwe mu dibatiiza dya bwena Kilisto: “Némbatiijiibwè, Mukalenge.”

¹⁷⁸ “Pàngìkalà nciyi mwanjì kupeta Nyuma Mwìmpè to...” Neumanye pawikalà muMupetè. NeÀkupèèshè—NeÀkupèèshè ditwishiiywa ne Dinanga didì dikukèngela. Kaa, wèwè udi mufwànyine kwikala mwenze bishiilàngàne, mupete masaluka, bu mùdì mufwànyine kwikala mwele mbila anyì mwakule mu myakulu, cidì anu cìmpè. Kadi Dinanga dya Nzambi adi dyòdì kadìyimù to, ungiitabuuje mpindyewu, amba ne: “Mukalenge, teekaku munda mwa mwoyi wànyì, ne munda mwa musuuka wànyì, dikumbaja dya kiipacila kàà Nyuma Webè, bwa mèmè kunanga, ne kutwa mushinga, ne kwikala ne Dinanga dya Nzambi adi munda mwa mwoyi wànyì, leelu ewu, didì difwànyine kuya naanyì ku Buloba abu piikalà mweyelu wànyì wà ndekeelu mwa kungumuka,” patùdì tusambila apa. Sambila, wèwè mwine, mpindyewu. Mu wèbè mushindu wà sungasunga, sambila, lomba Nzambi bwa akwenzele cyòcì aci.

¹⁷⁹ Ndi mununange. Ndi mununange. Nwènu balume bàà mvyà ku mitu bàdì basòmbe apa aba, bàkaadi benzènze mudimu mukole ne badiishèdiishe bānà bakese abu! Nwènù baamaamù bakulakaji, bakwate ne bya luse bàkaadi bakùpùlèkùpùle binsonji kwìsù kwàbò abu! Itàbàku nkushindikile eci, wèwè mwaneetu wa bakaji munanga, kabyena mushindu awu to dyàmwàmwa dya mweyelu mukwabo wàwa. Ndi mèmè

ngiitabuuja kakùyi mpatà to ne Cìdi mu cibambalu emu. Cìdi anu mmu cipaapu citùdi basòmbèle. Eci cìdi anu ndibola ditùdi basombèlemù mpindyewu.

¹⁸⁰ “Kadi swìlakù munda mwànyì, Mukalenge, diswa Dyèbè dya kwikala nanku.” Sambila, patùdi tusambila cyapamwe apa.

¹⁸¹ Ne kaneemu kònsò, Mukalenge, biimànyìne pa cishimikidi cya Díyi Dyèbè ne cya Nyuma Mwímpè Webè, tudi ne disanka be dya kumanya ne Dilediibwa dyetu dìdi difumina penyì. Tudi ne disanka dya mutùdi “balediibwe kakùyi ku diswa dya muntu, anyì ku diswa dya musunya, kadi ku diswa dya Nzambi.”

¹⁸² Nenku tudi tulomba, leelu ewu, Taatù, bwa ne aba bàdi munkaci mwa kulomba mpindyewu ngàsà udi ufwà luse aba, Nyuma Webè ènzèku mudimu awu, Mukalenge. Kakwenaku mushindu wà mèmè kucyenza to; mèmè ndi anu muntu wetù ewu, mukwabo mwànà wa Kishà. Kadi tudi Neebe Wèwè dijinga, Nyuma Mwímpè.

¹⁸³ Nzambi, anyìshàku ngìikalè bu Samwèlè, udi wamba Bulelela bwa Díyi. Ne Wèwè udi muDishindikèshindike, bwa too ne leelu, ne ndi ngiitabuuja ne Wèwè neutungunuke, bwa pàncidi mushààle ne lulamatu Kùdi apa.

¹⁸⁴ Swaku bwa bôbò bônsò mpindyewu bàpetè Mwoyi wà Cyendèlèlè, Taatù. Swaku bwa dituku edi kadibàbàfukukù to. Pa dîbà dyalwabo kushiyangana ne buloba ebu, swaku bwa cyôci eci, cîndi mfuma ku dibambila eci, cikangukè cìlwe cintu cilelela. Ne patùdi basòmbè kaaba aka apa, bàà cifwaka, leelu ewu, biikàle tutangila pa dîbà dyetu dya ku diboko apa, tutùma meeji ku didya dyetu dya mundaamuunya, ku mudimu wà mààlabà, ku diditacisha ne midimu mikole ya panwapa ne, kabyakwikalaku dîbà adi nansha. Byònsò abi nebijimine. Kakwakwikalaku diditacisha to, kadi anu disanka dya Cyendèlèlè kacya dyàngatangana. Bapèèshèku Mwoyi wà mushindu awu, Taatù, muntu ne muntu. Ne swaku . . .

¹⁸⁵ Ndi nKulomba nunku, Taatù, bwa ne muntu yònsò udi kaaba aka mu dinda emu, udi munteeleje ndonda cikeena-kumona eci, swaku bwa ngaatwilangana ne yònsò wa kùdìbo luseke lukwabo lwàlwa; nansha mùdìku mwa kwikala bantu balume mwab'ewu bàdi bafwànyìne kubenga kutwa ku cyànyì, ne bantu bakaji kabidi. Kadi, Taatù, kùlekedikù aci citùcyàmakana mu njila to. Swaku bwa twatwilanganaMu naabo, ne bwa kunyeemabo pààbò lubilu, ne bwa twètù kuupukilangana muntu ne mukwèndè, twela lubila lukole ne: “Mwaneetu wa mushinga mukole.” Anyìshàku bwa biikalè mwakaleejiiwbabi Mwàmwa amu, Mukalenge, bwa bônsò, bônsò bândi munange, ne bônsò bàdi bannange abu. Ndi ndomba bwa biikalakù mushindu awu, Mukalenge. Ne mèmè ndi mubanange bônsò. Anyìshàku bwa bààmwènèka, Taatù. Ndi mbapeesha Mwoyi wà Cyendèlèlè

mpindyewu. Swaku bwa bôbò bènzè wàbò mudimu, bwa kuWitaba. Bwalu ndi ndomba nunku mu Dinà dya Yesu. Amen.

¹⁸⁶ Tudiku anu ne tusunsa tukese cyanààna, bwa kusambidila babeedi. Ndi mmona ne tudi ne mwàna wa bakaji mutekete, udi usaama mwab'ewu, ne inàbànzà kampanda mu nkwasu.

¹⁸⁷ Mpindyewu, kùdì bânà beetu bàà balume, bânà beetu bàà bakaji bàà mushinga mukole, bu nwênù mwa kuswa kanungumvuku bibi to. Ncyèna—ncyèna mumanye ne cìvwà cyenzèke ncinganyì to. Ncyèna mumanye ne cìvwà cyenzèke ncinganyì to. Kadi, Nzambi, pàngààfwà, anyishàku bwa ngààlukilè Mwômò amu. Anyishàku anu bwa nye mu Mwaba awu, mwômò amu mmùndì muswe kwikala, mwònsò mùvwàku amu. Mèmè ncyèna nteeta bwa kwikala Pòlò wàkangaciibwa muulu mu maulu miisàtù awu to. Kì ng'aci cìndì ngamba to. Ndi ngiitabuuja ne Yèyè ùvwa ùteeta anu bwa kunkoleshaku ku mwoyi, ùteeta bwa kumpeesha kaacintu kakese kampanda bwa kunsaka bwa ntungunuke, mu mudimu wànyì wà bwambi mupyamupya wùdì wùlwa kumpala eku awu.

¹⁸⁸ Mbifwànyine kwikala bya dipanga dya kaneemu bu mèmè mwa kubalaku cintu kampanda mwab'ewu, mu katanci kakese cyanààna anyi? Mbifwànyine kwikala bimpè anyi? Cimwe cya ku bikandakanda bya bitàmbe kwikala bya mushinga munene bya ditunga edi, Billy Graham:

Docteur Billy Graham Mubiikidiibwe Kùdì Islam, pa dibèji dya pampala pàà cizubu pàà cikandakanda cya *The Afrikaans Times*, cya matuku dikumi ne ataanu a ngondo mwibìdì, cidimu cya 1960. Mufundi wa kaabwalu aku, uvwa Mùzùlùmanyì, mwena Mahomet, ùdì wèla meeji ne bivwa bikèngela bwa bishima kwikalabi bifila diyiisha dya Evanjeeliyo wa Kilisto, umwèumwè awu makeelela, leelu, too ne kashidi. Tudi tuteela mèyì aa ne: ‘Bidi nunku: Kilisto wàkalaya bayiidi Bèndè, pààkambàYe ne: “Ewu udi uNgiitabuuja, byenzedi biNdi ngenza yèyè neàbyènzè pèndè; yèyè neènzè too ne binène bitàmbe ebi.” Ekeleeziya kacyakacya ùkaadikù mwenze byenzedi, mu mushindu wa, byambiibwà bya—bya Kilisto abi mu Bible anyi? Yèyè ùdikù mwa kubyenza leelu ewu anyi? Ekeleeziya nansha wa bishi, ùdì mwa kudìsunga pa kwenzaku nansha mene cyabibidi cimwe cya bishima byàkenjiibwà kùdì Kilisto abi, katùyi twamba “byenzedi bitàmbe bunene” abi anyi? Wèwè, bu muntu-nkààya, wa luumu, mwakwidi wa patooke wa mwena Kilisto, udikù mwa kujuuka, kujuula bafwe ne kubaaluja ku mwoyi mu mubidi ewu anyi? Udikù wèwè mwa kwendela pa mbù anyi? Udikù wèwè mwa kwondopa babeedi ne kutabaja mpofu anyi? Eci nunku, kì mbilondèshile cikondo cidì citeediibwe kuulu eku, cidìbo baleeje kùdì mwena Mahomet eci anyi? Anyi kuteeka, ànyì diteeta dya kùdì Kilisto...?...bayiidi bu mùdì bidìbo

balàkelake mukana kùdi bamwe, anyi mu ngiitabùùjilù wenu?” Byàbúngì bya kaabwalu kàà Mùzùlùmanyi ewu pa bùtookà bìdi anu mèyì mumvwa bibi mangatangane.”

¹⁸⁹ Bàdi badyombola Mùzùlùmanyi ewu, kadi pèndè's ùvwa mubinge. Kadi cyàkambabo ncyôci eci:

Dyandamuna ditàmbe bwîmpè pa bìdi bitàngilà kubala kwa Bible, ne kumanya kwa Coran. Coran ùdi ùyooba bwa . . .ku . . .ùvwa muyoobè ku difwànyikija adi. Dilàkà dya mukana dya ne ci-Mùzùlùmanyi ncyà cikèmeshangana ne nciitàmbe bwena Kilisto adi, didi,” anu (m-i-k-a-a k-a) ya menemene, “dya mikaaka,” (ngeela meeji), “didifwànyikijila. Mufundi ewu, nansha nanku, mmuye kalenga kantu kàà mushinga munene kàdi kàtàngilà bishima bya mu Ekeleeziya. Mwab'ewu kabidi tudi twela meeji matooke a mufundi ewu mpatà, bwalu nganyi udikù mufwànyine kufunkuna munu ne mufwànyine kwela mpatà bishima byenza kùdi Révérend William Branham kumpala kwa ba-Mùzùlùmanyi mu Afrike wa ku Sud, pàvwà binunu dikumi byakìdile Kilisto bu Musungidi mu mudimu wà bwambi wà William Branham, mu Durban, mu Afrike wa ku Sud, ne myaba mikwabo pa buloba bujimà, anyi T. L. Osborn mu Afrike wa ku Esete apu? Mu bushuwa bwa bwalu, tudi tushààla batwe Billy Graham nyama ku mikolo lukama pa lukama. Tudi bayiikilàngàne pa kantu kàà dikokangana aku, kí nkàdi ne . . .Kantu kàà dikokangana aku kí nkàdi ne mushinga to.”

¹⁹⁰ Kadi munkaci mwa kantu ne kantu kàà bwalu abu (Kumbiikilabò . . .bàmba mutùvwà bakoleshi bàà maalu, mutùvwà katùyi bamanye citùvwà twenza.), bààkenzejiibwa bwa kufilabo bujaadiki, mu cibejibeji cyabo bôbò biine, bwa ne Nzambi mmucyènzè cya bushuwa, nansha bishi. Nzambi ùdi Nzambi leelu ewu, anu mùvwà Ye kwônsò aku amu.

¹⁹¹ Nudi bafwànyine kubenga kwela meeji ne bôbò kabàtu bacitàbùùje to, kabeena baciòmàkù to. Kacyena anu cisokoka to; kí ncyenjiibwe mu musokoko to.

¹⁹² Kadi bantu binunu nkama basòmbe pààpa, bacitàngile. Pààkamònàbo mwànà wa balume uvwa mucibukile panshi, mwikàle ne lutatu awu ùlwa mwaba awu, Nyuma Mwîmpè kumwambilaYe maalu a mu nsòmbelu wendè, ne bikwabo, ne cìvwà cyenzèkemù aci. Ki kumonabo ba-Mùzùlùmanyi binunu dikumi bàdyàdija panshi, batwè cyàdi panshi, biitaba Yesu Kilisto bu Musungidi wabo sungansunga.

¹⁹³ Tucidi anu ne ba-T. L. Osborn, ne bakwabo, bàcidi anu bàdiishangana Cyakudya cya mikooko. Ngeela meeji ne Mwaneetu Osborn kàtukù yèyè mwanjì kufika munkaci mwa ba-Mùzùlùmanyi to. Bàtu bôbò bàlàka mukana bàmba mùdìbo ne bwenzeji kutamba bakwabo bônsò. Kadi twètù tucidi anu ne

Nzambi udi mwa kusungila mikooko ku nyama wa ntambwe, udi mwa kusungila mikooko ku nyama wa ours.

¹⁹⁴ Ncingenzele mêmè bîmpè pa kumanya ne bôbò bàvwakù benzejiibwa bwà kucifunda ne kucijingulula. To, bôbò bàdi bèèla meeji ne kabeena bènza nanku to; bàdi bàasa lwendu bàya ne bàcyèla nyima, bàmba ne: “Kya, awu matuku’s àkaadi mamane kupita.”

¹⁹⁵ Mùzùlùmanyi awu yêyè kwamba ne: “Mmamane kupita? Nanku Bible mujimà’s ùkaadi mumane kupita. Nwênù bônso nudi bapiile. Nudi nukuukwila Muntu, Muntu wâkafwà, ne uvwa Dînà Dyèndè Yesu awu. Ne Yêyè mmufwe, kùkaadi ntanta mule, ne cintu pààci ne Yêyè mmubiike ku bafwe kacitukù to.”

¹⁹⁶ Kadi kabaakapeta mushindu wà kwamba aci ku disangisha dya ku Durban adi to. S’ki Yêyè awu uvwa mwimane munkaci mwa kwenza cintu cimwecimwe cyàkenzàYe aci, cyôci kubajaadikila. Mpindyewu nansha mangumba miine—miine bidì bikèngela bwa kwalukilawu, muntu mwine udi mumfundile ùngambila ne bidì bikèngela mêmè kwalukila cyànyima pa bidì bitàngilà dilongesha dyànyì dya Bible awu, yêyè awu nguvwa mwenzejiibwe bwa kufunda cyôci aci mu cibejibeji cyabo aci. Nzambi neàbènzèjè bwa kuMutumbishabo, nansha bishi, dîbà adi, nansha nanku. Ncya bushuwa. Yêyè’s ngwabafikisha ku diMutumbisha, nansha bishi.

¹⁹⁷ Tudi ne mwânà mukese wa bakaji, musòmbe kaaba aka. Ki mmwaneebe mwine awu anyi? Lutatu lwèndè lùdi cinyi, mwaneetu wa bakaji? [Mwaneetu wa bakaji ùdi awu wàmba ne: “Ndisaamà dya mashi azololoka mu bwongò.”—Muf.] Mandamu wamba ne? [“Disaamà dya mashi azololoka mu bwongò.”] Disaamà dya mashi azololoka mu bwongò. [“Ndi mukufundile, kùkaadi bidimu byàbûngì, pa bwalu bwa disaamà dyèndè dya mashi azololoka mu bwongò adi.”] Kaa, eyowa. [“Yêyè ùdi ùsaama patùdi twakulangana apa, netùjè bidimu binaayi bulubulu mu ngondo wa mwandamukulu.”] Bidimu binaayi, mu ngondo wa mwandamukulu. [“Mwaneetu Neville’s nguvwa muye kamumona.”] Kaa, ngwa ku Marengo awu anyi, anyi ngwa mu mwaba mukwabo kuntwaku? [“Paoli.”] Paoli. Nanku, ewu ki yêyè mwine mwânà wa bakaji awu anyi? Kùdi cintu anu cimwepele, maamù, cidi mwa kusungila mwânà wa bakaji ewu: ncya ne, Nzambi mmumumanye. [“Yêyè’s ùkaadi muumvwe bîmpè bikole kutamba mùvwàye.”] Ndi ne disanka dyàbûngì bwa bwalu abu.

¹⁹⁸ Wêwè uvwa mukùye bwa kamusambidila anyi, Mwaneetu Neville? [Mwaneetu Neville ùdi wàmba ne: “Eyowa’s, mukalenge.”—Muf.] Kacya anu Mwaneetu Neville wàya kamusambidila, yêyè’s nyawu ùkaadi muumvwe bîmpè bikole. S’nyawu kùcidi anu balami bàà mikooko bàdi bamanyè Cyakudya cya mikooko.

199 Lutatu lwebe lùdi cinyi, mwaneetu wa bakaji munanga, wêwê udi musòmbè mu nkwasà wàwa, lwèbè wêwê? [Mwaneetu wa bakaji kampanda ùdi wàmba ne: “Ùdi ne kansere.”—Muf.] Kansere.

200 Ee, bu mêmè mwa kunulombaku anu cintu kampanda, pàmwàpa mwab’ewu mene. Mbanganyi mwab’ewu bàkaadiku bondopiibwe ku...ku kansere? Elàayi byanza byenu muulu. Tangila kuneeku, mwaneetu wa bakaji. [“Yèyè ùdi mpudimaci anu wa menemene, ne kàyi mwa kuumvwaku byùdi wamba abi to.”—Muf.]

201 Nzambi ngudi Mwondopi. Tudi bamanye aci. Bu mêmè mwa kunwambila ne ndi mufwànyine kuya kwàka ne kuumusha disaamà dya mashi àzòloloکا munda adi kùdi mwànà wa bakaji wàwa ne kumwondopa, s’ndi mufwànyine kunwambila cya cyanàànà, anyi ne, ndi mufwànyine kuumusha kansere kùdi mukaji awu. Kadi ndi mumanye cintu cimwepele ne, kùvwa nyama wa ours (kansere, cyùjà cya kansere, bufofo, nansha mene lufu) mubakule wùmwe wà ku mikooko ya Nzambi, dिंगà dituku, kadi mêmè kupatuka kuya ne bukole bwa Nzambi, kumushebeya ne kwalukila ne mukooko awu. Neya bushuwa. Nenku tudi tupatuka tuya leelu ewu, katùyi ne cintu kampanda cya cinène nansha, *cikampanda*. Mêmè ndi mpatuka nya ne ndundu mukese wa nyuunyi wa patupu wa disambila. Yèyè ngwàmwaluja.

202 Udi witabuuja aci’s, kî mmwômò anyi, mwaneetu wa bakaji? Ne wêwê pèèbè, udi witabuuja, kî mmwômò anyi, mwaneetu wa bakaji? Mbanganyi bàà kunùdi aku bàdi bìitabuuja mpindyewu ne mwoyi wenu wònsò?

203 Mpindyewu inyikaayaaku mitu yenu pànkaadi nya kasambila apa.

204 Taatù munanga, nsongààkàjì wa citende mulenga kwìsù nyèyè ewu mulaadika mwab’ewu, udi kàcìyìkù mwa kwendela kabidi kuulu to, anyi kwendakana, Wèwè kùyi mumukwacishe. Mwena lukuna nyewu mumukwate. Bwalu bwèndè mbupite ngangabuka nî ngwa bishi mutu. Mwena lukuna mmumukùpe kule kwa dikema mu cibwashibwashi mwàmwa, mu mushindu wà ngangabuka kàyi mwa kwenzaku cintu nansha cimwe to. Kadi bwalu bwèndè kî mbuKupite Wèwè mutu to, Mukalenge. Yèyè ùdi mwaba anu wà Wèwè mwa kuteeka cyanza Cyèbè pambidi pèndè. Mwimànyine pa Dìyi dya Nzambi, ndi ntentekela nsongààkàjì wa citende ewu byanza, ne mpiisha disaamà dya mashi àzòloloکا mu bwongò edi. Mu Dìnà dya Yesu Kilisto, ndi mmubiikidisha mmwaluja cyakabidi ku mukaji anu bu mùdi bònsò emu. Yèyè neikalè ne mwoyi bwa butumbi bwa Nzambi. Swaku bwa yèyè ikalè ne bukole bwa mubidi, ùbwela upàtuka mu ekeleeziya emu, bu mùdi bakwabo bàkaadi babwelè

aba, bifwànàngàne ne cyôci eci, afile butumbi kùdi Nzambi. Biikalè nanku, ku Yesu Kilisto.

²⁰⁵ Byenze bu mùdi dibwe dya mashika dya ku nsuki yèndè, anu ndambu mukwabo wa dinyunguluka, yèyè ùmba úsanganyiibwa mu Buloba bwa dyàmwàmwà mùmvwà nciyikù kabidi mukamone mukulakaji nansha umwe to, anu bansongà. Kadi bananga bèndè basòmbe apa, bàdila myadi, ne bamunangè. Mwena lukuna munene udi mumubàkùle ne mumukùpe mwaba wùdi mupite ngangabuka mutu, nyama wa ntambwe wa kansere wa úkwácishangana bwôwà. Nzambi, nyewu ndwa, ngenda mmulonda. Ndi ndwa bwa mèmè kumwaluja. Ndi nshebeya nyama wa ntambwe wa kansere awu, mu Dìná dya Kilisto udi kàyikù mucimunyiibwe, Úndi mèmè mùlòpò Wèndè awu. Swaku bwa cìmuumukè, ne bwa yèyè ikalè ne bukole bwa mubidi, ne kabidi, àshaalè ne mwoyi bidimu byàbùngi, bwa buneeme ne butumbi bwa Nzambi, mu Yesu Kilisto Mukalenge wetù.

²⁰⁶ Mpindyewu, Taatù wa mu Dyulu, aci kaciyi anu mu bya mvita binène to, kadiyi difùmà dyengeleja, ngaakwilù ne myaku milongolola ya mwakudi kampanda to, kadi mwikàle ne ndundu wa nyuunyi mukese wa ciibidilu, wa diitabuujà. Nyewu mwwila musuuka ewu, ne mubidi wùdi mwena lukuna kansere mubàkùle ne mumukùpe mwaba wùdi mupite ngangabuka mutu. Kadi nyewu mmuwila, mu dinda emu, Mukalenge, mmwaluja ku mpàtà wa lutende lubishi lwà mu ditalàjà ne ku màyi matalale. Mu Dìná dya Yesu mucimunyi, úndi mèmè mùlòpò Wèndè. Ne diitabuujà dishuwashuwale ne dya meeji matooke, ndi ngiitabuujà ne yèyè nealujiibwe, ku bukole bwa disambila ditwènjì edi. Biikalè nanku . . . ? . . .

²⁰⁷ (Ndi ngeela meeji ne kùdi mudimu wà dibatiiza. Mmwòmò anyi?) [Mwaneetu Neville ùdi wàmba ne: “Eyowa’s, mukalenge. Bayiishi babidi bàcìdi ne bantu kampanda bàà kubatiiza.”—Muf.]

²⁰⁸ Nudiku mwa kajuula mitu yenu bwa katanci kakese cyanàànà anyi? Mpaasata nyewu ùfùma ku dingambila . . .

²⁰⁹ Bantu aba bàdi bàsaama bikole, bikole be. Nebùmwè wè bímpè. Kanwenjiku . . . Mbímpè. Mulayi wà Nzambi kawùtu wùpangilakù to. Tuyààya bwa kubalonda.

²¹⁰ Bàdi ne mudimu wà kubatiiza. Kùdi bamwe bantu bàdi ne cya kuya. Netwikalè mwa kwenza kabidi disangisha diloolo edi.

²¹¹ Kùdikù kaaba aka bàdi bafwànyìne kubenga kulwa diloolo edi, bàdi baswe bwa tunwènzèlè disambila mpindyewu, bàdi kabàyi ne mushindu wà kwikalaku diloolo edi anyi? Nanku swayi nulwe kuneeku, nwènù bàdi kanùyì ne mushindu wà kulwa diloolo edi abu. Nèngiikalè ne dībà bùngi butàmbidile; bwa kwenza mulongo wà babeedi, diloolo edi. Bikèngela bàbatiizè bantu aba.

212 Udi ne mwânà mukese wa balume kuntwaku anyi? Eyo. [Mwanèètù wa balume kampanda ùdi wàmba ne: “Mbikumbaneku bu mèmè mwa kukupeesha eci eci anyi?”—Muf.] Eyowa’s, mwaneetu wa balume. Twasakidila wa manza tente. Mbikumbaneku bu mèmè mwa kucibala paanyima ndambu anyi ànu mpindyewu? Twasakidila, mukalenge.

213 Mpindyewu bu nwènù mwa kutupeeshaku kabidi ntanta wa kasunsa kamwe anyi tubidi, dîbà adi tudiku bafwànyine kwenza mu—mudimu wa—wa dibatiiza. Ndi mumanye ne nenuswe bwa kuwumona.

214 Nenuku aba bàdì bàjinga dibatiiza mu dinda edi abu, ee, nwènù, bainábànzà bàyiilè lwà *eku* bwa kushintulula bilàmbà, ne balume bàyiilè bôbô ku *elu* luseke. Ne dîbà adi pàncidì munkaci mwa kusambidila babeedi aba apa, dîbà adi nudi mwa kwikala nudilongolola bwa mudimu wà dibatiiza. Ne aba mpindyewu bàdì . . .

215 Mpindyewu, diloolo edi, nènteetè bwa kwenzaku mulongo mukese wà—wà babeedi, diloolo edi, dyakamwe, pàdìbo anu ne baabwedi. Nenuku netwikalè mwa kubangila mu Mukanda wà kumpala wà Efeso, diloolo edi. Ne netwikalè ne disanka dîngi mpindyewu bwa kwikalaku neebe, pawikalà kùyi ne ekeleeziya wa wèwè kuya. Kadi pawikalà ne mpaasata webè ne ekeleeziya webè wa sungasunga, dîbà adi wèwè—wèwè ndaaku mu ekeleeziya webè wa mushinga mukole útù utwa nyama ku mikolo awu.

216 Nwènù bàdì ne cya kuya, ne bìikalà mwa kuumuka pa dîbà edi abu, Nzambi anubeneshe. Nulwayi bwa kwikalaku kabidi neetu panwapeta mushindu. Netwikalè ne disanka dya kwikala neenu.

217 Bidi bikèngela bwa kukusambidila pèèbè anyi, wèwè, mwaneetu wa balume? Lutatu lwebe lùdi cinyi? Mashi àya lubilulubilu.

218 Mpindyewu, nwènù bakwabo aba, panùcidì biinyike mitu yenu apu, katanci kakese, tudi baswe kusambila.

219 Taatù, ndi nKwela twasakidila, leelu ewu, bwa ndundu mukese wa nyuunyi wa mulami wa mikooko, disambila dîdì ditwishe nyama wa ntambwe binù, ne mwânà mukese wa mukooko mmunyengibwe kùdiye, ne mmwalujiibwe kùdì mamwëndè ne tatwëndè. Ndi nsambidila mwaneetu wa balume. Ndi ndomba bwa Wèwè kumwaluja, yèyè pèndè, mu dikubiibwa, Mukalenge. Swaku bwa lwendu lwà mashi ne ntatu ya mubidi wèndè bijikè. Ndi nya bwa kumulonda, Mukalenge, bwa kumwaluja, mu Dînà dya Yesu Kilisto. Bìikalè nanku. Amen.

Nzambi akubeneshe, mwaneetu wa balume.

Pàndì mpweka apa, ndi nkumona mukwate mwânà wa balume, mpofo.

220 Cintu cikiwabo cimwepele cîndî muswe kwamba. Mwya ngenza. . . nsaama bikole, mvwa ndûka. Ki mêmè kudyambidila ne. . . Ncyêna muswe bwa eci cinùpîtè to, nwênù ne mushindu. Mêmè kudyambidila ne: “Nzambi, cîndî mufwànyîne kufila ncinyî bu mêmè mwa kuumvwa muntu kampanda wîmana pambelu? Mukàjàànyî’s mmufwànyîne kwamba ne: ‘Billy, nyewu kùdi muntu mulume mukulakaji mukalanga mwaba ewu mulwe kumonangana neebe.’

221 “Kadi ki kaamuntu kakese kâlwalwà aka, kàà mutu dibàla ne myedi ya mvya ku cibanga kwônsò. Mufwànyîne kubwela, kwamba ne: ‘Wêwè ki Mwaneetu Branham?’

“Mêmè mufwànyîne kwamba ne: ‘Eyowa’s, mukalenge, mmêmè.’

222 “‘Dyànyî n’Simona.’ Ûtentekela cyanza, ne ùntàngila ndambu. Wàmba ne: ‘Wêwè udi mwena kwitabuuja, Mwaneetu Branham.’

“‘Eyowa.’

223 “‘Byônsò nebîikalè bîmpè.’ Simona Peetèlò, wa mu Bible awu. Mushindu mwine wûndî mufwànyîne kwanyisha cyôci aci’s! Kî mbifwànyîne kukengela bwa kwambaye byâbûngî to. Anu kuntentekela cyanza cyanàànà, bwa ngûmvwè bîmpè.”

224 Nenku dibà adi cîdî cilwè kûndî, ku dyambulwisha dya Nzambi, ne ku ngàsà wa Nzambi, kùdi makumi a binunu bya bantu bìtabuuja cintu cimwecimwe aci, bu mêmè mwa kulwa kùdîbo. Nenku mêmè kudyambidila ne: “Nanku, Mukalenge, ndekèlèku mfikè kùdî yônsò kûndî mwa kufika aku. Ndekèlèku anu—anu. . .”

225 Mêmè kudyambidila ne: “Bu Simona, anyî anu Pòlò awu, anyî umwe wa kùdîbo, mubwelè anu cyanàànà wàmba ne: ‘Wêwè ki Mwaneetu Branham?’

“‘Eyowa.’

226 “Ûtentekela byanza, ne ùntàngila, wàmba ne: ‘Eyo, Mwaneetu Branham,’ pèndè ùmba ùpâtuka.

227 “S’ndi mufwànyîne kuumvwa bîmpè’s. S’ndi mufwànyîne kwikala ne mubidi tumatuma. Bushuwa’s. Ngamba ne. . . Balumyana, bukîtu bwànyî’s mbufwànyîne kubànda dibà adi. Mêmè mufwànyîne kwamba ne: ‘Nèngûmvwè bîmpè.’” Eyowa’s, mukalenge.

228 Ne kùdi bantu bàdî bìtabuuja cintu cimwecimwe aci leelu ewu. Ne cyôci aci’s ki cîndî ndwila mwaba ewu bwa kwenza, kunutentekela byanza, kulomba kùdî Nzambi.

229 Ndi muswe nye ne mwànà mukese wa balume ewu, mwaneetu wa bakaji, katanci kakese cyanàànà. Mmwànà wa balume mukese, mpofò. Yèyè ùdi mpofò kùkaadi ntanta bule kaayi? [Mwaneetu kampanda wa bakaji ùdi wàmba ne: “Kacya

anu ku dilediibwa dyèndè.”—Muf.] Kacya anu ku dilediibwa dyèndè.

²³⁰ Wetwawu, wêwè mwânà mukese wa balume! Kaa, wêwè's udi mwânà mukese wa balume, mulenga be...?...

²³¹ Éyì Nzambi wa ngàsà! Cipite bangangabuka mutu, ku dilediibwa dya mwânà mukese wa balume ewu, mulediibwe mpofo, ne kàyikù mwa kumona to; mwânà mukese mulenga wa balume, udi usànkisha ewu. Kadi mwena lukuna, kumpala kwa mwânà mukese ewu kupetaku pèndè dyèsè dya panwapa, mmumukùpe mwaba wùdi mupite ngangabuka mutu. Pa nanku, mèmè ndi mpatuka nya kamulonda, mu dinda emu, Mukalenge. Ndundu mukese wa nyuunyi wa patupu ewu, wa disambila. Itabaku bwa mmwaluje, Nzambi. Ndi ntwilangana ne mwena lukuna, dyabulu, mu Dîna dya Yesu Kilisto, ne ndi nnànyina Nzambi mwânà wa balume ewu. Ndi nnana lumònò lwèndè, ndùnanyina Nzambi, mmwalujila civwà Sataana mumwibe aci. Swaku bwa acipete. Mu Dîna dya Yesu Kilisto, necyenzeke. Mpindyewu, bìikalè nanku.

²³² Mpindyewu, mwaneetu wa bakaji, munanga, mpindyewu, kwikadiku ne mpatà nansha mikese to bwa ne mwânà mukese wa balume ewu neikalè mwa kuumvwa bîmpè. Nenku ndi muswe ne, wêwè wàlukilè nendè ku ekeleeziya eku, bwa kuleeja bantu ne, yèyè ùdi mwa kumona, mmwòmò anyi?

Mèmè ndi mmupèèsha lumònò lwèndè, mu Dîna dya Yesu Kilisto...?...

²³³ Mukalenge Yesu, bwa kutentekela...Mwânà mukese ewu utùdi benzelenzele disambila! Kadi, mu dinda emu, nyewu ndwa cyakabidi mu Dîna dya Yesu Kilisto, mwambule ndundu wa nyuunyi mukese ùdi Wêwè mumpeeshe ewu. Ne Wêwè ukàadi mungambulwishambulwishe ne cyôci eci, Mukalenge, ku Bukole Bwebe, bwa kunyenga...mukana mwa kansere, mukana mwa lufu lwôlò lwine, kujúula bafwe paanyima pàà bamane kujikula ne mbafwe, ne bashààle buumakane ne bakwate mashika. Ndi ndwa ngenda ndumbatangana ne mwena lukuna ewu, mu Dîna dya Yesu Kilisto. Nenku mmwalujileku cyakabidi bukole bwa mubidi, Mukalenge. Enzaku nanku. Byènjiibwè nanku, bwa butumbi bwa Nzambi.

²³⁴ Ne wêwè bikèngela kukusambidila anyi? [Mwaneetu wa bakaji kampanda ùdi wàkula ne Mwaneetu Branham—Muf.] Wêwè udi mwena kwitabuuja anyi? [“Eyowa.”] Mukalenge, nyewu ndwa nende, mu mwaba wùdi ndundu mukese wa nyuunyi ewu ùfika. Mu Dîna dya Yesu Kilisto, swaku bwa cimuumùkè ne kacyalukidiku kabidi to.

²³⁵ [Mwaneetu wa bakaji kampanda ùdi wàkula ne Mwaneetu Branham—Muf.] Ee, ndundu wa nyuunyi mukese umwèumwè ewu, wákaya kapeta Mwaneetu Harley, ne bwa mwaneebe wa bakaji ne wêwè mwine.

²³⁶ Mpindyewu, Taatù wa mu Dyulu, nyewu ndwa ngenda ndumbatangana ne mwena lukuna, mwikàle nkwàta mudimu ne ndundu mukese wa nyuunyi ûdì Wêwè mumpèèshe ewu, bwalu Wêwè wákamba ne: “Wêwè mufikishe bantu ku diitabuujà, ne wêwè ne meeji matooke paùdì usambila,” lusoka lukese alu neluye too ne kaaba kàà dishebeyangana. Swaku bwa lùye mpindyewu, Mukalenge, pândì ndutuma bilondèshile dilomba dyèndè apa. Mu Dîná dya Yesu Kilisto, swaku bwa bìikalè nanku. Amen.

²³⁷ [Mwaneetu wa bakaji kampanda ùdì wàkula ne Mwaneetu Branham—Muf.] Eyo, mwaneetu wa bakaji. Mpindyewu tudi. . . Dinyunguluka dya mutu ndipite bangangabuka mutu. Bôbò bàdì mwa kukupeesha cintu kampanda bwa kukutuuyishaku cilunji, kadi necikwenzele bibi bya bipite, paanyima pàà cyôci aci. Eyowa. Mpindyewu tàngiláku. Twétù netupatuke tuye twenda tulumbatangana naaci, mu dinda emu. Kupatuka; kukwaluja. [Katupa kàà mukaba wà mēyi munda mutupu.]

²³⁸ Mukalenge Yesu, . . . [Katupa kàà mukaba wà mēyi munda mutupu—Muf.] . . . nsoka mikese yitaanu, d-i-i-t-a-b-u-u-j-a, ne ndundu wa nyuunyi wa disambila. Nenku nyewu ngaaluja mwaneetu wa bakaji mmutuula ku nkanu ya dinyunguluka dya mutu adi. . . ? . . . mwámwa naka. Ndi mmwaluja ku ditalala ne ku mpàtà ya lutende lubishi lwà mu ditalàjà ne ku mâyi matalale. Ndi ngenza nunku mu Dîná dya Yesu Kilisto. Amen.

[Mwaneetu wa bakaji kampanda ùdì wàkula ne Mwaneetu Branham—Muf.]

²³⁹ Taatù Nzambi, mwànà mukese wa bakaji ewu, tudi ne disanka bwa ne kacìwwa dyenda diteketa dya misunya to. Kadi nansha ciikàle cinganyì, kacýèna anu mwa kuKupita Wêwè mutu to, Mukalenge. Nenku ndi ndwa ne ndundu wa nyuunyi mukese wa diitabuujà awu, ne lusoka elu. Ne ndi mbònda lusoka elu ne makanda ônsò bwa mêmè kulutuma. Mu Dîná dya Yesu Kilisto, swaku bwa lwàsè mwaba muludikila. Swaku bwa mwaneetu wa bakaji ùmvwè bìmpè. Ndi ngenza nunku mu Dîná dya Yesu Kilisto.

[Mwaneetu wa bakaji kampanda ùdì wàkula ne Mwaneetu Branham—Muf.]

²⁴⁰ Pàdì maamù mutekete ewu, ne mwanèndè mukese, mwànà udiyè muswe katwilangana nende dyàmwàmwà, luseke lukwabo lwàlwa, mu Buloba bwa butumbi bìndì mfuma ku dyamba abu, nenku nyewu bàdì. . . Maamù kààkushààla ne mwoyi too ne ku. . . dikolesha dya mwànà mukese awu to, ne mwànà mukese mwine awu kèna mwa kushààla ne mwoyi ntanta mule kakùyi dikwacisha Dyebe to. Kadi nyewu ndwa ne ndundu wa nyuunyi, ne makanda ônsò awu ne ndudi bìndì mwa kwasa naabi mwena lukuna abi. Nenku mu Dîná dya Yesu Kilisto, ndi mmwasa cyôci

eci. Bòbò nebúmvwè bîmpè, bwa butumbi bwa Nzambi. Mu Dîná dya Yesu. Amen.

[Mwaneetu wa bakaji kampanda ùdi wàkula ne Mwaneetu Branham—Muf.]

²⁴¹ Kaa, abi's mbilenga bya dikema. Ndi ne disanka. Ee, mudimu wà bwambi awu, díbà adi, wùvwa mudimu wà bwambi mutàmbe bunene wà difunkwinaku bantu. Cìvwa cifunkuna ku byenzedi. . . ? . . .

²⁴² Taatù wetù wa mu Dyulu, Sataana nyewu mukùpe maamù mutekete ewu mwàmwa mu mwaba wùdi mupite bangangabuka mutu. Bòbò bàdi mwa kusàshilangana anu bwanga cyanààná mu mushindu awu, Mukalenge, aci's necìmunyangè cikampanda, cìmunyangè cikansanga, biikàle anu bimukolèle nansha bwa kumanya ne mpenyi pàdiye. Ne pashìshe pàdiye wàlukila mu yèyè, ùshààla mu mushindu mutàmbe bubu. Kadi nyewu ndwa ne ndundu wa nyuunyi wa diitabuuja ewu, ne lusoka, ndudikila ne ndudi ya buludi, bwa kuludikila cintu aci. Mu Dîná dya Yesu Kilisto, ndi mmuumusha dinyunguluka dya mutu edi, bwa butumbi bwa Nzambi. Amen.

[Muntu kampanda ùdi wàkula ne Mwaneetu Branham—Muf.]

²⁴³ Nzambi munanga, Mwaneetu George uvwa mulààle kwàka, ùpùnga ne lufu wàwa, kí nkwanjì kwenza ntanta to, mvwa mumone cìvwa diitabuuja kampanda dimwenzèle. Mpindyewu nyewu mupeté binyoka, Mukalenge. Tudi bamanye ne bàvwa mwa kumupeesha bwanga bwa dituuyisha dikùyila, cintu kampanda cìvwa cifwànyìnekù kutuuyisha mikenyi, kadi kacyakuumushaku cintu aci to. Pa nanku tudi tuludikila ne disambila edi, mu Dîná dya Yesu Kilisto awu. Swaku bwa binyoka abi byumuke. Swaku bwa yèyè alukile kwèndè kumbelu ne ùmvwè bîmpè.

Twasakidila, mwaneetu wa balume.

²⁴⁴ Wetwawu, nyànaanyi! [Mwaneetu wa bakaji kampanda ùdi wàkula ne Mwaneetu Branham—Muf.] Kaa, ekelekele! Bumpudimaci. Udiku wèwè mwa kuumvwa nansha kakese anyi? Uh-huh. Cipite cyumvwilu cya muntu wa cifwaka! Wèwè udi mwena kwitabuuja mu Mukalenge Yesu anyi? [Mwaneetu wa bakaji awu ùdi wàmba ne: "Amen."] Ndi mmona mukaji mulenga kwîsù Mwàmwa, dimwe dya ku matuku àdi panshi aa. Newikalè cyakabidi nsongà bwa kashidi. Ndi mumanye ne wèwè udi muswe kwikala ne mwoyi mpindyewu bwa butumbi Bwèndè. Kwalukila ku . . .

²⁴⁵ [Mwaneetu wa bakaji awu ùdi wàmba ne: "To, mèmè ndi ne dibungama bwa mwanàànyì wa balume."—Muf.] Mwaneebu wa balume. ["Udi muye kùkaadi bidimu bipite pa bibidi awu."] Kwèna ne mushindu wà kumupeta anyi? ["Udi mu cyanza cya Nzambi."] Kaa, ùkaadi—ùkaadi mufwe? ["Uh-huh. Mupicile

mu cibandabanda cya lufu.”] Kaa, aci’s. [“Kadi dibungama dyànyì’s.”] Mutuuta kùdi dibungama. Eyowa. [“Ndi . . . mutuuta kùdi dibungama. Ne ndi ngumvwa bu ne, pìikalàbi ne ndiswa dya Nzambi, ndi muswe Àngangàtè. Ncyênàku ne cingà cintu to pa kuumusha anu disanka mu Yèyè.”]

²⁴⁶ Mwaneetu wa bakaji munanga, ndi muswe bwa uye mu mwaba wùdi udyumvwa bîmpè. Yèyè ùvwa muumvwe cikeena-kumona aci, mu dinda emu anyì? [Mwaneetu wa bakaji mukwabo awu ùdi wàmba ne: “Yèyè’s ùkaadi mwa kuumvwa bîmpè.”—Muf.] Ee, ùmulondèlè.

²⁴⁷ Ee, yèyè neakulondele cìdi cyenzèke. Anu dyàmwàmwa dya mweyelu wèbè kaaba aka, nkùdi mwaneebe wa balume wa musinga mukole awu mukwindile. Newikalè nsongà mùdiye yèyè amu. Nangà, ikàlà anu munange . . . [Mwaneetu wa bakaji awu ùdi wàmba ne: “Ncyèna muswe kushààla to. Ndi muswe kuya kùdiye yèyè aku, pìikalàbi ne ndiswa dya Nzambi.”—Muf.]

²⁴⁸ Taatù wa mu Dyulu munanga, lubilu lwà panwapa lwamànyì kwenjiibwa. Kì nkushààle kabidi byàbûngi to. Nenku mwanèndè wa balume wa musinga mukole awu, dyàmwàmwa dya musulu, bu yèyè anu mwa kutapa dîsù paanyima, yèyè’s mmufwànyine kwamba ne: “Anu matuku makese cyanàànà.” Yèyè ewu mmwindile bwâtù, Mukalenge, bwàmupicishà mu mafwima, kuya nende too ne ku Buloba bwa butumbi abu. Anyishàku ùmubènèshè, Taatù, ne ùsambè mwoyi wèndè. Ne swaku bwa cyòci aci kwikalaci ditwilangana dinene, anu dyàmwàmwa dya musulu.



MFÛMÛ MUBÈNGIIBWE LUA60-0515M

(The Rejected King)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu mu dinda, mu matuku 15 a ngondo mwithânù, cidimu cya 1960, mu Branham Tabernacle mu Jeffersonville, Indiana, U.S.A. Ndyumusha pa mukaba wa méyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org